

**EIGHTH LEGISLATIVE ASSEMBLY OF MIZORAM  
(THIRD SESSION)**

**LIST OF BUSINESS**

FOR FIFTH SITTING ON TUESDAY, THE 18<sup>th</sup> JUNE, 2019  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu ZORAMTHANGA**, Hon'ble Chief Minister & Finance Minister to lay on the Table of the House a copy each of the following :
  - i) Finance Accounts 2017-2018 Volume-I relating to Government of Mizoram.
  - ii) Finance Accounts 2017-2018 Volume-II relating to Government of Mizoram.
  - iii) Appropriation Accounts 2017-2018 relating to Government of Mizoram.
3. **Dr. R. LALTHANGLIANA**, Minister to lay on the Table of the House a copy of the Separate Audit Report of the Comptroller & Auditor General of India on the Accounts of The Mizoram Khadi and Village Industries Board, Aizawl for the year ended 31 March 2016.
4. **Pu L. THANGMAWIA**, to lay on the Table of the House a copy of the Statement of Action taken by the Government against Committee on Local Fund Accounts (COLFA) Further Recommendation contained in the Sixth Report on Technical Inspection Report on Local Administration Department on Urban Local Body and Rural Local Bodies for the year 2013-2014 relating to Local Administration Department.

**PRESENTATION OF REPORT**

5. **Dr. ZR. THIAMSANGA** to present to the House a copy each of the following :
- i) First Report on Actions taken by the Government on the recommendations contained in the Eleventh Report of the Subject Committee-III relating to Rashtriya Swasthya Bima Yojana (RSBY) under Health & Family Welfare Department.
  - ii) Second Report of Subject Committee-III relating to National Mission on Oilseeds & Oil Palm under Agriculture Department.

**FINANCIAL BUSINESS**

***GENERAL DISCUSSION ON THE BUDGET FOR THE YEAR  
2019-2020.***

6. General Discussion on the Budget for the year 2019-2020 (to be concluded)

**S.R. ZOKHUMA**  
Commissioner & Secretary

....

**S P E A K E R** : Chhanna nemin thinur a tikiang thin a, Tawng huatthlala erawh chuan thinur a chawk tho thin. Thufingte 15:1

Vawinah hian kan Deputy Chief Minister zahawm tak Pu Tawnluia a la thei lo a. Hei hi sawi ve ziah a ngai thin a, a paw khawp mai. Zawhna leh chhannaah kan kal nghal anga.

Starred Question No.56-na zawt turin member zahawm tak Dr. Z.R. Thiamsanga i lo sawm ang.

**Dr. Z.R. THIAM SANGA** : Pu Speaker, ka lawm e. Hon'ble Minister Tourism Department chhan atan :

Starred Question No.56-na ka zawhna chu henge hi an ni :

- a) Tourism department-in Tourist Lodge, Chaltlang to Durtlang Ropeway a siam mek hi engtika zawh tur nge?
- b) He Ropeway siam hi chhunzawm zel a ni em?
- c) Chhunzawm loh ni ta se engvanga chhunzawm loh nge a nih?
- d) Tun sorkar hian chhunzawm a tum em?
- e) He Ropeway siamtu company leh senso zat tur min hrilh thei em?

**S P E A K E R** : Chhang turin Minister zahawm tak Pu Robert Romawia Royte i lo sawm ang.

**Pu ROBERT ROMAWIA ROYTE, MINISTER** : Pu Speaker, ka lawm e. Member zahawm tak Dr. Z.R. Thiamsanga zawhna chhanna chu :

- a) Ropeway hi zawh hun tur hriat theih a la ni lo a ni.
- b) Tunah hian hna hi chawlh rih a ni.
- c) Ropeway kalkawng turah hian harsatna a awm a, chu chu chin fel a nih loh chuan chhunzawm theih a ni lo.
- d) Tun sorkar hian heng harsatna awmte hi chin fel a tum mek a ni.

e) A siamtu company chu Ropeway & Resorts Pvt. Ltd. Kolkata te an ni. A senso zat tur chu ₹ 2482.58 lakhs a ni. Ka lawm e.

**S P E A K E R** : Phar nasa hle mai, a phar hmasa ber Dr. F. Lalnunmawia i lo sawm ang.

**Dr. F. LALNUNMAWIA** : Pu Speaker, ka lawm e.

Zawhbelhna tlem ka zawh duh chu sorkar hmasa hun chhung khan Tourism Department hian hna Mizoram hmun hrang hrangah hna a thawk a. Chu chu document enge maw te kan nei nual a. Hmun tam tak an hnathawhna hi zawh mumal si loh, sum tam tak hman tawh si, a then chu tihtawp leh delink te a ni a, a project central atanga an rawn tihtawp leh te. Tin, hmun tam tak an hmalaknaah hian zawhfel si loh, a taka hman theih si loh leh sum sen nasat si hi a tam viauin a lang a.

Tin, kan bial Lungleng ramah te pawh sum eng emaw zat hmanga, hman tlak tak tak si loha kalpuite a awm a ni. Hmun hrang hrangah Integrated Development of Eco-Tourism Desk Station tih te, Development of Eco-Tourists Eco Adventure Kid tih te hmun hrang hrangah hian siam/kalpui a ni a. A lan dan maiah hian sorkar hmasa chhung khan Tourism lamah hian sum siam nan hian kan hmang deuh em? A tak tak tourists hip zawnga hmasawna hlawhtling tak tak si lo hian tihte ngaihtuahnaah a lo lut a. Minister zahawm tak hian heng Mizoram hmun hrang hranga project kan kalpuite hi min chhuichian sak thei em?

Tin, tun aia mumal leh tha zawk hian kalpui dan min ngaituah sak thei em tih kha ka zawhbelhna a ni e.

**S P E A K E R** : Helamah ka lak pawlh dawn opposition lam hi a ngai flat. Pu C. Lalsawivunga member zahawm tak i lo sawm ang.

**Pu C. LALSAWIVUNGA** : Pu Speaker, ka lawm e. Development of Eco-Tourism hnuiaia hnathawh Durtlang leh Chaltlang-ah te hian component eng zat nge thawh zawh a nih tawh tih leh heng hna te hi guidelines anga hnathawh zawh hun tur min hrihl thei em tih kha ka zawhbelhna a ni e.

**S P E A K E R** : No.63-na leh 64-na a la awm a. In la zawt leh dawn nia. Zawhna neitu Dr. Thiamsanga i lo sawm ang.

**Dr. Z.R. THIAM SANGA** : Pu Speaker, ka lawm e.

Tourist Lodge Chaltlang to Durtlang thlunzawmna tur ropeway siam hi ka hriat sual loh chuan nikum kum bul ni 3.4.2018 khan, khatih hunlaia Tourism Minister zahawm tak khan Asia rama ropeway sei ber tur a nih thu kha a sawiin ka hria a. Khami a foundation hawn ni pawh khan Pu Speaker, nang pawh kha i tel khan ka hria a. Hei hi Mizo te tan pawh thil thar, khualzinte tan pawh Mizoram an lo tlawh chakna tur thil pawimawh tak, Mizo faten kan nghahhle em em a ni a. Chuvangin, hei hi tun kan sorkar hian chhunzawm turin ruahmanna a rawn siam kha a lawmawm hlein ka hria.

Ka han zawhbelh duh chu Rural Home Stay Scheme hnuaiiah Champhai district hi pilot district niin ka hria a. Tah khan khua Vangchhia te, Dungtlang te, Vaphai te, Zokhawthar leh Hnahlan leh Chawngtlai, Khawbung te kha thlan an ni a. He scheme hi a taka kalpui a ni tawh em tih ka zawt duh a. A taka kalpui tawh ni se heng khua atang hian Rural Home Stay Scheme hnuaiia mikhual thleng tawh zat te hi a hriat theih em tih leh Reiek tlanga Zokhua sak mek hi physical report min hrih thei em? Sak zawh tawh ni se tu kuta awm tur nge tih kha ka zawhna a ni e. Pu Speaker, ka lawm e.

**S P E A K E R** : Chhang turin Minister zahawm tak, a hla deuh karkik deuh deuh pawh a awm a, a theih chin chin chhang turin ka sawm e.

**Pu ROBERT ROMAWIA ROYTE, MINISTER** : Pu Speaker, ka lawm e. Zawh belhnaa Prof. F. Lalnunmawia zawhna leh rawn sawichhuah kha a pawimawh khawp mai a. Ni e, Tourism Department hi ka lak tirh atangin a luhaithlak khawp mai a, Assembly Session kan neih hmasak ber tum pawh khan ka sawi chhuak tawh a.

Tourism Department ka han enkawl tirha kan liability (kan leiba) work order te issue vek tawh si, mahse, a scheme decline (tihtawp) avanga sum lo kal leh ta si lo avanga liabilities awm kha cheng nuai 4000/- zet a ni tih khami tum pawh khan ka sawi tawh a, tun tumah pawh hian sawi nawn leh a ngai a ni. Chu chu PIDDC an tih scheme central sorkarin 2015-a a decline thut avang khan khami scheme hnuaiia Mizoram hmun hrang hrang hmun 19 laia hnathawh mekna, contractor-ten an thawh mawlh mawlhna kha ti tawp a ngai a. Central-in a tihtawp a. Kan state sorkar

atangin chhunzawmna mai tur pawisa a awm baw si loh avang khan tangkhang tam tak a awm a, chu chu kan harsatna bul lo intan chhoh dan a ni.

Chung avang chuan infra-structure lian tak tak bul tan tawh 20% zawh tawh te, 30% aia tam zawh tawh te, thenkhat chu tung uaih tawh ang chi te zawh lohin a awm ta a. Hemi chungchang hi kan hma hun lamah pawh khan theihtawp Department-in an lo chhuahna a ni a, mahse, thil tih zung zung theih a ni lova. Scheme ber a tawp si avang khan a Ministry, Ministry of Tourism hnuai vek atanga scheme dang han subsume-na tur siam a awm lova. He scheme tawp dan hi scheme tawp dan mak tak ni te pawhin ka hria . Scheme lian a tawp chuan scheme dang Ministry atangin subsume (pakaina) tur ruahman thin a ni tlangpuiin ka hre ve a. Chutiang chu Tourism Ministry-a a awm loh avangin harsatna kan tawk chho nasa tih kha sawifiah nan hian ka hmang duh a.

Tichuan hmun tam takah MLA zahawm tak tak te pawhin in rawn sawi hlawm a, ti hian kal ngaihna an hre lova, zawh law law si loh hian Tourist Lodge facilities dang tepawh a tam. Ngaihtuah ngai in rawn tih thin kha hemi scheme delink vang a ni tih ka sawi duh a ni.

Tichuan theih ang angin kan han sorkar ve hnuah hian tan kan han la zui ve a, tunah hian beiseina kaw l chhete chuan a eng ve hian ka hria a. Tourism Ministry hrim hrim atang hi chuan kha a scheme delink tawh project ho chhunzawm dan hi chu kan sorkar hnuah pawh Delhi lamah ka zuk zin ve a, Minister te, Secretary te ka zuk ti tipui ve ngial na ah pawh chance a awm lo khawp mai. Mahse, kawng dang department-in kan zawng zel a. Tunah hian NEC leh DONER lam te kan dawr a. Chung chu helaia kan gap neih hi a bridge tura DONER Ministry leh NEC lo din chhan hi chu line department leh line ministry lian te tih zawh theih loh leh tih zawh sen loh awm ang chi gap rawn bridge tura ding te pawh in ni baw a. Mizoramah chuan kan laklawhna a ni a, North-east state-ah pawh an laklawhna a ni a, ngaih pawimawhah nei teh u tiin ngaihtuahna hmangin kan han bei ve a, tunah hian PIDDC scheme atanga kan lo zawh thui tawh 100% lo zawh ang chi te, 80% lo zawh tawh ang chi te kha chu min ngaihpawimawhpui khawp mai a. Chung atan chuan tun financial year tawp dawn 29<sup>th</sup> March, 2019 pawh khan kan ngenna ngaihpawimawhin NEC chuan rem leh rem loin te pawh ti ila, he House-a sawi lan chakawm tak Pi Lalrodingi, NEC Adviser, Tourism changtu pawh a tangkai hle a,

chu chu mimal hming mah ni se ka sawi lang duh a. Chung te nena kan tan tlanna avang chuan nuai 237 ni tain ka hria, physical progress sanna zual rulhna tur atan khan minrawn pe a, beih zui zel kan tum a ni tih ka sawi duh a ni.

Zawhbelhna zawttu Prof. Lalnunmawia rawn sawi ang chi hi a zavaiin heng liabilities leh la zawh loh ang chi zo duak duak thei lo mah ila kan bei chho zel dawn a ni tih ka sawi duh .

Tin, member zahawm tak Pu C. Lalsawivunga zawhna, Chaltlang leh Durtlang-a Tourism project-ah hian component zawh tawh a awm em tih lai kha a tawi zawngin zawh a la awm lo a ni tiin ka chhang mai ang e. Tin, Dr. ZR.Thiamsanga, zawhna neitu zawhbelhna Rural Home Stay chungchang kha, Rural Home Stay hi Mizoram tan chuan idea thar te pawh a nihna lai a awm a. Champhai District khaw 6 kan cover mek a, hlawhtling takin unit 35 zawh tawh a ni a. Tin, an mikhual zat te pawh kan han inzawt a. Kan hotuten number minrawn pe vat a, 1300 chuang hun reilote Rural Home Stay kan hawn chung hian Tourism Department-in mikhual a nei a. Thingtlang lama mikhual thlenna tur anmahni in te han zawma, lo sak belha, kan tanpuina nena tangkawpa an lo tih atangin mikhual duhawm tak tak 1300 chuang an lo thleng hman tawh a ni tih ka sawi duh a. Home Stay-a a unit cost hi a hniam khawp mai a, nuai 2,29,000 /- a ni a, khimi Champhai bik khi pilot project a nih ang khan khaw 6 cover a ni a, unit khat sak nan kan hmang a, unit 35 zawh tawh a ni .

Tin, ongoing hi unit 25 Mamit District-ah a awm a. Champhai District tho Khawhai-ah phase II-ah unit 7 sak mek a awm bawk a ni. Project Programme cost effective tak, insenso tlem ang hua effect ngah tak, effect nei lian tak project a ni a, tun financial year tharah pheichuan lian zawkin Govt. of India leh a funding agency te nena tangkawpa Rural Home Stay leh Urban Home Stay thleng pawha hma lak kan tum a ni tih ka sawi duh a ni.

Zawhna neitu Dr. ZR Thiamsanga zawh belh leh sawi belhna chungchang kha hemi Ropeway Chaltlang atanga Durtlang Ropeway chungchang hi sawi tur tam tak a awm a. Pre-Feability study (Speaker : Tawitein sawi tum rawh aw. I sawi tam chuan a chi lovang). (Pu Speaker, tawitein sawi ka tum ang e). mumal a awm loh avangin a kawngah harsatna a awm han tih ringawt kha high tension lines pakhat Power Department, Mizoram sorkar ta leh Power Grid Corporation of India

ta high tension lines 3 a awm a, a in kar ah khian khimi khi han sut a ropeway han thlun tlang kha a hmaa beiseina awm chu a ni a, sawi tawh ang khan study lawk mumal a awm loh avangin, kha kha a theih loh bur a, ti mai ang, tuna kan hriat theih dan chinah chuan. Kan sorkar ve hnuah pawh Delhi -ah Tourism Minister te, Power Secretary te pawh keimah ngeiin ka zuk hmu a, han inkawm chuan an fel em em a, mahse ka D.O. letter pawh min rawn chhang leh tawh a. Power Ministry-a an hotupa berin 'he high tension lines hi sut theih a ni lova, helaia in harsatna tawh hi kan solve pui thei lo che u a ni', tiin lehkha min rawn thawn a. Option awm ta chu tunah hian kan dil nawn leh dawn em tih leh, a line hi a hnuailamah kan kal tir dawn em ni tih leh, a hmun hi kan sawn dawn em ni tih rawtna a awm a. A hmun sawn hi sorkar hmasa hunlai khan khami high tension line avanga an tih theih loh khan sawtah Hmuifanga sawn an lo dil tawh a. Chu chu Govt. of India-in Hmuifang-ah chuan mihring te an lo tlem deuh a, mipui a hmangtu an lo tlem avangin an lo phal tawh lova. Kan han nih ve hnu khan a ngaia tih tlang leh chu kan han tum a, ka sawi tawh ang kha a ni a. Tunah hian Lammual A.R Ground atanga Zemabaw lam hi option pakhat awm thei chu niin kan hria a. Kan hma lawk ni 26/6/2019-ah hian technical survey team kha an lo chhuak dawn a. Mahse, a hmun sawn hi thil namailo tak, Govt. of India pawhin a tih zen zen loh a nih avangin kan hlawhtling thei ang nge tih chu kan chiang lova, beiseina erawh chu kan nei tih ka sawi duh a ni e. Pu Speaker, ka lawm e.

**S P E A K E R :** Starred Question No. 57 na zawt turin Dr. K.Pachhunga kan sawm e.

**Dr. K. PACHHUNGA :** Pu Speaker, ka lawm e. Hon'ble Minister, Power & Electricity changtu chhan atana ka zawhna chu : Lunglei South bial chhung Sailen, Mautlang, Vairokai leh Ngiautlang hian power supply engtikah nge an neih theih ang tih ka zawt e.

**S P E A K E R :** Chhang turin Power & Electricity Minister Pu R.Lalzirliana i lo sawm ang.

**PU R. LALZIRLIANA, MINISTER :** Pu Speaker, member zahawm tak Pu K.Pachhunga zawhna chhanna chu - heng khua te hi tun kum 2019 chhungin tih en tum a ni.



**S P E A K E R** : Zawhbelhna zawt turin member zahawm tak Pu Lawmawma Tochwawng a phar hmasa ber, i lo sawm ang.

**PU LAWMAWMA TOCHHAWNG** : Pu Speaker, ka lawm e. Ka zawhbelhna chu hei hi a ni. Minister zahawm tak P&E changtu chhan atan - Lunglei leh chhim lamin kan nghah hlelh em em 132 Kv alternate line hi hun eng emaw chen kalpui a ni ta a. Kan lo hriat danin kum 3 lai mai contractor hi hun pek belh a ni chungin a la zo lova. Kumin March thla kha an hun pek belh hnuhnung ber, a tawp hun a ni a, mahse, an la zo lo cheu a ni. He line hi eng chen nge hna thawh a nih tawh a, engtikah nge zawh theih beisei a nih a Lunglei lamin kan lo chhawr theih ang le tih kha ka zawhna a ni e

**S P E A K E R** : Pu B.D Chakma i lo sawm ang.

**Pu B.D CHAKMA** : Pu Speaker, ka lawm e. MLA bial 40 zingah ka bial hi a zau ber a, khaw 83 ka nei a. Tin, Thega lam hi khaw 25 vel a awm a, chuta tang chuan khaw 4-ah chauh electric a eng a. A bik takin Ugulsuri model village hi electric minute 5 vel chauh a eng thin a. Tunah free electricity connection atan meter pawh vuah a ni tawh a, mahse zan lama eng thin chu solar a ni. Chuvangin, heng model village Ugulsuri leh Thega lama khaw tam tak unelectrified a awm a, hei hi electrified tumna a awm em tih ka zawt belh a ni e.

**S P E A K E R** : Tunah zawhna neitu Dr. K. Pachhunga ilo sawm ang?

**Dr. K. PACHHUNGA** : Pu Speaker, a changtu Minister-in a lo hriat chian theih deuh nan tlemin ka han sawifiah ang a.

Vairawkai-ah hian ka hriat sual loh chuan 2012 khan hrui an zam tawh a, mahse contractor leh a thawktute sum pek that theih loh avangin an hlip leh a. Chutih lai chuan Mautlang hi in 60 lek an ni a, a ban hian a daihlo niin an VCP in a rawn report a. A khua hi khaw zimte a ni a, ban 4 te chu han belh se tih kha ka ngen duh a. Chutih lai chuan Sailen hi a han hla na in in a tlem a, mahse MNF sorkar hmasaah an lo eng ve tawh a, tun thlengin Congress sorkar kum 10 chhung khan an eng lova. Mombati an chhi rei tawh bawk a, khawngaih takin a hma lamin eng min chhit sak ve se tih ka han zawh belh a ni e.

**SPEAKER** : Chhang turin Minister zahawm tak Pu R. Lalzirliana i lo sawm ang.

**PU R. LALZIRLIANA, MINISTER** : Pu Speaker, ka lawm e. Zawnha zawh belhtu Pu Lawmawma Tochwawng (Kum 1 kum 2 te kan thawhho chuan chiang turah in ngai ıla). member zahawm takin a han zawh kha, 132 KV line (alternate line) hi sawi ang khan tum 3 lai Contractor hi hun pek belh tawh a ni a. Hetiang ang hna lian hi an zawh hun tur an tukah hian zawh mai a har khawp a, a bikin electric hi eng emaw hriat loh thil compensation ngai leh helai tendera tel si lo, mi rama ban phun ngai te tam tak a lo awm thin a, chuvang chuan a hunah hian an zo hlei thei lo a ni, a paw ka ti khawp mai a, tum 3 lai pek belh tawh a lo ni nghe nghe a. Engtikah nge an zawh theih ang tih kha tunah hian chiangfakin kan sawi thei lova, zawh thuai kan inbeisei tawh a. Tin, he alternate line siam mek hi Melriat atanga Khawwiva direct tura Pu Speaker, siam niin ka hria a . Tin, a hma ami kha Zuanngtui – Bukpui – Khawwiva-a kal kual vel kha a ni a. Hemi a hmaa line awm hi thiat tur ni lovin hmun dangah hruaikawi a ni thung dawn a ni. Chuvangin theih ang tawkin tunah hian a ban phun an zo dawn tawh a, chulaia kan harsatna ber chu ground clearance kha a ni a, chumi chu ti tha leh turin Department lam hian hma an la leh mek a ni tih kha ka chhanna a ni a.

Tin, member zahawm tak Pu B.D. Chakma zawnha kha, nia , a khuaah hian zawnha dangte pawh a la awm a, a rawn zawt duah mai a, an khaw tan a tha khawpin ka ring a. A khua ni lovin, engpawh ni se aman a hrechiang zawk ang a, khaw 4 chauh eng nei thin an awm an ti a. Heng te hi tihen vek tumin tunah hian nasa takin hma lak a ni. Keini tum mai ni lovin central-in pressure min rawn pek mek lai a ni a, theihtawp kan chhuah a ni.

Zawnha neitu in a a han zawh Sailen tih te hi a dik khawp mai a, heng khua a rawn sawi Sailen, Mautlang, Vairokai, Ngiautlang tih te pawh hi tunhmaa electric tihen tawh te a ni a, hun hmasa lam daih MNF sorkar laia lo tihen tawh thenkhat te pawh kha a awm a. Amaherawhchu helai hi hmun kilkhawr deuh hlek a nih piah lamah thli na tak tak tleh chang te a awm bik a, helama kan tawrh mang loh te, tin; ruahsur leiminin a tihchhiat tam tak kha a awm bawk a. Chutiang piah lamah chuan khatianga electric current a kal loh lai khan a hrui leh eng eng emaw lo ruk bo kha a

tam em em mai a, chung avang chuan a tir atanga bul tan ang deuhthawa tharthawh leh a ngai thin a ni. Chutiang chu department tan hian a hautak khawp mai a, sanction dang han zawn thar leh te kha. Amaherawhchu tunah hian theihtawp department lamin kan chhuah a, 2019 kum chhung hi chuan tihen vek theih kan inbeisei a ni.

**SPEAKER** : Starred Question 58-na zawt turin member zahawm tak Pu Lalrindika Ralte kan sawm e.

**PU LALRINDIKA RALTE** : Pu Speaker, ka lawm e. P&E Department changtu Minister zahawm tak chhan atan ka zawhna te chu :

- a) P&E Department hian kum 2019 January, February, March thla 3 chhung hian electric power lei nan eng zat nge sum a sen?
- b) P&E Department hian kum 2019 January, February, March thla 3 chhung hian electric bill atangin sum eng zat nge a lak luh?

**SPEAKER** : Chhang turin Minister zahawm tak Pu R. Lalzirliana kan sawm e.

**PU R. LALZIRLIANA, MINISTER** : Pu Speaker, ka lawm e. Member zahawm tak Pu Lalrindika Ralte zawhna chhanna chu hei hi a ni:

- a) P&E Department hian kum 2019 January, February, March thla 3 chhung hian electric power lei nan ₹ 8,273.74 lakhs a hmang.
- b) P&E Department hian kum 2019 January, February, March thla 3 chhung hian electric bill atangin ₹ 7,601.73 lakhs a lalut a ni.

**SPEAKER** : Zawhbelhna Pu H. Biakzaua i lo sawm ang.

**PU H. BIAKZAUA** : Pu Speaker, ka lawm e. Ka zawhbelhna chu electric bill dik lo a tam hle mai a, complain chuan an lo siam dik ve leh thin bawk a. Thenkhatah phei chuan thlatin deuhthaw in complain loh chuan bill a sang thei lutuk a, hei hi tih dik theih a ni ang em tih ka zawhbelh a. Tin, a pahnihnaah chuan tunhma deuh khan thingtlang amite hnenah hian electric department-in bill a khawn thin a, thingtlang an va kal a, VC te tlang an au tir a, electric bill pekna hmun an siam a, an pe thin a.

Tunah hian chutianga ti lo chuan khaw thenkhatah chuan pekna hmun tur khaw hla deuh ah khan an siam a, khaw dang atanga pan ngar ngar kha a ngai mai a. Chuvang chuan department lam hian tunhmaa an tih ang khan an khuaah kal chilhin, kha khuaa electric bill kha an khawn leh thei ang em tih ka zawhbelh a ni. Ka lawm e.

**SPEAKER** : Dr. Vanlalhlana a phar hmasa zawk tlat, i lo sawm ang.

**Dr. VANLALHLANA** : Pu Speaker, ka lawm e. Ka zawhbelhna chu Power Purchase Agreement ZEDA(Zoram Energy Development Agency) nen khan rooftop solar PV plants-ah khan neih a ni a. Hei hi engtianga kalpui zel nge a nih tih leh, subsidy (zaa sawm sarih) 70/100 pek tur a ni a, tun June thlaa tawp tur a ni a. Hei hi mipui hnenah hriattima a awm em tih ka zawt a ni e.

**SPEAKER** : Zawhna neitu member zahawm tak Pu Lalrindika Ralte, i lo sawm ang.

**PU LALRINDIKA RALTE** : Pu Speaker, ka lawm e. A chiah chu hre lo mah ila kan sum hloh kha rin aiin a tam lo khawp mai a, a lawmawm hlein ka hria a, (Speaker : Ka lo chawk a, lost kha a lan dan chuan nuai 672 vel a ni e.) Aw le, ka lawm e. Tichuan Pu Speaker, ka zawhbelh duh chu kha, tang deuh sela, khang ai khan a la tlahniam thei dawnin a hriat a. Tlemin an tang deuh thei ang em ? Tin, kan leina ang zah te kha a hmuhchhuah theih ang em tih ka zawhbelhna a ni e. Ka lawm e.

**SPEAKER** : A theih ang anga chhang turin Minister zahawm tak Pu R. Lalzirliana kan sawm e.

**PU R. LALZIRLIANA, MINISTER** : Pu Speaker, member zahawm tak Pu H. Biakzaua zawhna kha, hnathawk tu hi kan indaih loh em avang hian hetiang hian thingtlang khua te deuh te chu khaw hnai deuhah khan an han chah khawm ni tur a ni a. Tunhmaa an tih anga tih leh theih chu tha ka ti a, chutiang chuan department lam pawh thurawn ka lo pe ang.

Tin, Dr. Vanlalhlana, member zahawm tak zawhna kha Power Purchase Agreement chungchangah rooftop solar hi tunah hian a tawp mai dawn a, chuvang chuanrawn ti sup sup se kan ti khawp mai a. A tha khawp mai a, keipawh ka ti a, electric bill hi ka chawi ngai tawh miah lo, connection fee tih loh hi

chu, ₹ 1,500/ 1,600 vel chawi thin kha ka ni a, tunah hian Electric Department-a dil let tur sum ka nei ve teuh tawh a ni, sang engemawzat chu a ni tawh ang, chutiang chu a inkhawl tawh a. Chuvangin, Aizawla inchung nei tha te hi chuan ti vek sela ka ti khawp mai. Kha kha a zawhna ka chhan theih chu a ni mai a. Tin, a tha em em a, 70% subsidy a ni lehngal a, chuvangin keini ang miretheite ban phaka tih theih chi a ni a, thil tha tak a ni.

**S P E A K E R** : Starred Question No. 59-na zawt turin member zahawm tak Pu Lalduhoma i lo sawm ang.

**PU LALDUHOMA** : Pu Speaker, Health & Family Welfare Department changtu Minister zahawm tak chhan atan ka zawhna :

- (a) Serchhip-a Nursing School leh Hostel hi engtika sak zawh nge ?
- (b) Engatinge enkawltu leh vengtu dah a nih loh ?
- (c) Engtikah nge a function ang ?

**S P E A K E R** : Chhang turin a changtu Minister zahawm tak Dr. R. Lalthangliana ka sawm e.

**Dr. R. LALTHANGLIANA, MINISTER** : Pu Speaker, member zahawm tak Pu Lalduhoma zawhna chhanna chu :

- (a) Serchhip Nursing School (Administrative cum teaching block leh Hostel block pakhat) hi May, 2018 khan construction chu zawh a ni a. Tui connection leh electric connection te tih hmabak a ni a, hma lak mek a ni. Hostel dang pakhat tur hi sak mek a ni bawk.
- (b) Tun dinhmunah department kutah hlan a la nih loh vang a ni.
- (c)
  - i) Teaching staff leh non-teaching staff thawktu tur ngaihtuah mek a ni.
  - ii) Peih fel a nih hunah Indian Nursing Council-in hawn phalna a pek chuan hawn ve theih a ni ang tih kha ka chhanna chu a ni.

**S P E A K E R** : Member zahawm tak Pu Lalrinsanga Ralte zawt belh turin i sawm ang.

**PU LALRINSANGA RALTE** : Pu Speaker ka lawm e. Ka zawhbelhna chu hei hi a ni :

Bilkhawthlir PHC-ah khuan X-Ray khawl kan nei a, technician kan nei bawk a. Bilkhawthlir PHC khu a pantu khua an tam khawp mai a. Amaherawhchu, X-Ray khawl khu dahna tur building kan nei lova. Tunah khuan khawl tha deuh leh technician kan nei a, a building khu min sak sak thei ang em tih kha ka zawhbelhna ni se. Tin, department lam estimate min siamsak a, a tam lem lo bawk a, kha kha kan Minister zahawm takin min sak sak thei vat dawn em tih ka zawhbelhna a ni e.

**S P E A K E R** : Zawhna neitu Pu Lalduhoma zawt belh turin i lo sawm ang.

**PU LALDUHOMA** : Pu Speaker, session hmasa khan he thil Serchhip-a Nursing School leh Hostel chungchang hi kan sawi tawh a. Minister zahawm tak hian a hmun pawh kha a tlawh tawh khan ka hria a, chu chuan kan beiseina te pawh a tisang zual a. Kha hmabak a la ko viau mai a, a building hrim hrim leh staff turte kha, process chung la awm deuh tur a ni a, kan hrethiam a. Amaherawhchu, tunah sawn a nih ang ang sawn, a duh duh an lut a, thilsual tih nan an hmang a, a tukverh glass te a chhe teuh tawh a, uiawm tham a ni a. PWD in hetiang building a sak hian a department concern hnena a handover leh hma hian vengtu hi an dah lo thin deuhin ka hria a hmun tam takah. Chumi chung remchang chu miin an lo chang a, khatiang kha a lo thleng thin a. Hei hi chu a department leh PWD hian co-ordination fel deuh nei sela, M.R. emaw tal a vengtu dah a nih loh chuan cheng tam tak kan hloh dawn a, M.R. hlawh kha chu a tlem zawk daih ang. Chutiang tur chuan hma min laksak thei ang em, tihchhiat lehzel a awm tawh loh nan tih ka zawhbelh a ni.

**S P E A K E R** : Zawhbelhna zawt hmasa turin phar hmasa zawk Dr. Z.R. Thiamsanga i lo sawm ang.

**Dr. Z.R. THIAMSANGA** : Pu Speaker ka lawm e. Chief Minister zahawm tak leh Health Minister chak tak hmalaknain Health Department staff indaihlohna a bik takin doctor leh nurse te min lakbelh sak dawn niin kan hria a, a lawmawm hle a. Hei hi kan nghakhlel tawh a, Health Department leh Zoram pumin kan nghak a. Engtikahnge min lakbelh sak theih ang tih ka zawhbelhna a ni a.

Tin, a pahnihnaah chuan India ramah doctor te indaihlohna a nasa a. A bik takin Prime Minister-in Central Health Service te chu an retirement age hi kum 65 ni turin 2016 khan a lo puang tawh a, chu chu 2016 la la khan India ram state BJP sorkarnaah pheih chuan an implement nghal a. Tichuan, W. Bengal-ah te, Bihar-ah te, Assam-ah te ; tin, state hausa biklo Arunachal-ah te pawh kum 65 a ni tawh a. Bihar-ah pheih chuan kum 67 a ni tawh a, Assam-ah te pawh khatiang khan an retirement age hi kum 65 a ni deuh vek mai a. Mizoram-ah doctor kan indaih lova, specialist pheih chu Zoram Medical College kan han hawng lehngal a, kan indaihlo hle mai a, saw sawn doctorte min pawt nasa a. Civil Hospital-a doctor tam tak khi nakum maia pension tur tam tak an awm a, chuvangin tunah hian doctor retirement age hi kum 62 emaw tal kan tih loh hi chuan kan sorkar hospital te pawh hi engtinngge kan kal zel ang tihte pawh ngaihtuah tham a ni tawh a. Chuvangin doctor retirement age hi central pawhin an tih tawh, state rethei zawk pawhin an tih tawh, India rama doctor indaihna tam tak pawhin an lo tih tawh hi keini Mizoram hian engtikahnge kan tih ve theih ang, hmalakna a awm tawh em tih hi ka rawn zawhbelhna a ni e. Pu Speaker, ka lawm e.

**S P E A K E R** : A theih ang anga chhang turin a changtu Minister zahawm tak Dr. R. Lalthangliana i lo sawm ang.

**Dr. R.LALTHANGLIANA, MINISTER** : Main question hi Nursing School tih a ni a, amaherawhchu, X-Ray lamah khan kan lut hlek a. Bilkhawthlir lama X-Ray khawl awm si, a in la awm lo tih lai kha bialtu hian a vei hle mai a. Hmun tam takah X-Ray khawl dahna tur hmun an siam hi ka tlawh tawh a. A nih dan tur nilo hi a tam em em mai a, en that ngai tam tak a awm a ni. Bilkhawthlir lam ami pawh remchang hmasaah sorkar leh department-in hma a la ang tih ka hrih duh a ni.

Tin, Dr.Thiamsanga sawiah khan thil pawimawh tak tak a awm a, post ruak fill-up chungchangah kan Chief Minister zahawm takin tul a tih em em hi Health & Family Welfare bik hi a ni tih a ti lang a. Budget Speech - ah pawh khan a tarlang a, kan lawm hle a ni. Loh theih loh ang chi post siam thar ni lo hi kan ngah hle mai a, tunah hian tan lak mek a ni. Amaherawhchu, DP&AR leh Finance te nen han sawiho phawt te a tul dawn a, chutiang chuan Cabinet a ngaihtuah turin hma kan la mek a ni tih kha ka chhanna ni sela.

Tin, Doctor service pawhsei chungchang hi India sorkar hian ngaihtuahna chu a lo nei ngei mai a. India ram state thenkhat nichina kan han tarlan ang khan hmun thenkhatah kum 62, 65 te tih a ni a. India ram hmun thenkhatah phei chuan doctor tam tak hian pawh sei kum 65 a nih mek lai pawh khan duh lem lo, private eng emaw ti duh zawkte pawh kha an awm thin a ni. Mizoram context-ah hi chuan kan indaihloh hle avang hian ngaihtuahna chu sen a ngai hle a ni. Engpawhnise hemi chungchang hi ngaihtuahna senga department pawhin hma kan lak chhoh tan mek a ni tih kha ka chhanna ni phawt sela. Heng hi chu thil lian tham a ni a, Cabinet-ah te pawh chhawpchuah ni turah te pawh beisei ila a tha awm e. A zawhna neitu tak Pu Lalduhoma hian a ngaipawimawh a, kei pawh kan sorkar hlim khan Serchhip Nursing School hi ka tlawh a, a sawi kha a dik chiah a ni. Ka hriat sual loh chuan Christmas hma kha a ni mai thei, khatah khan a chhe hle tawh mai a ni. Tin, building bul kha a chhia mai ni lovin hnimin a bawh lek luk mai a, a pawi khawp mai. Tin, Serchhip khawpui atanga tlema hla deuh penhle a lo ni bawk nen khan a fello hle a ni. Chuvangin Serchhip-a kan YMA te pawhin ‘duty dawnin a hla si a, a buaithlak khawp mai,’ an ti a ni. Chutih mek lai chuan a enkawltu tur kan la dah theih loh na chhan lai tak kha PWD ten department-ah min hand-over theih loh nachhan pahnih a awm a, mahse hei hi chu kan chingfel thei turah ngai ila. Security deposit kan release tepin ka ring a, thil tih fel hlek tur a awm bawkin ka hria a ni.

Chutih mek lai chuan a rawtna siam kha a tha mai thei, a satu PWD te leh department te nen inbiak tawna eng emaw stop-gap arrangement ang pawha tih kha a fel ka ring khawp mai a. Kan Engineering College hi kan sawi kai lawk ang a, sorkar hmasa khan Lunglei-ah a din a, a hmunah pawh



ka va kal a ni. Hetiang ang deuh chiah dinhmuna ding hi a ni a. Approach road a awm bawk si lo, electric supply awm bawk si lo, tui supply awm bawk si lo ; tin, staff lak a awm bawk si lo, engmah awm lo khan hetiang hian kan inhnutchhiah a. An ti hman lo te pawh a ni mai thei a ni. Tin, Principal leh staff quarter awm miah lo, heng Serchhip-a kan Nursing School te pawh hi a ni. Khang zawng zawng kha enfel vek a ngai a ni.

Tin, staff chungchangah chuan ruahmanna kan han siam a, tunah hian Principal leh Tutor tur 6 te, LDC 1 tih te kha min han phalsak ta phawt a. Tichuan a fill-up phalna hi tih leh a la ngai a ni, kan function dawn chuan. Tin, chumi piah lamah chuan Hostel-ah khan Tutor kan tih te leh Principal te kha an awm ngawt a rem si lova, eng eng emaw tih tur hi a tam em em mai a ni. Chuvang chuan Minister dangte ka hre lova, ka department-ah hian sorkar hmasa hian tha tura a lo ngaih chhonzawm loh theih si loh khatiang lu min tihai kha kan nei nual a ni. Tute emaw kan sawisel ni lovin thil chinfel tur kha a tam em em mai a ni. Chuvang chuan thla tam kan la sorkar lova chak taka hmalak chu kan tum a ni.

Tin, Serchhip mai ni lo hian kan hriat a that ka ring a. Champhai-ah te, Saiha-ah te pawh Nursing School hi kan han ti a. Thingdawl te pawh kan han function tak na a, pawh kual ringawt mai khuan kan function a ni. Ka rilrua awm chu Pu Speaker, kan sawi kual lawk ang a, channa a ni vek a. Tupawh lo sorkar ta ila central sorkar atanga a building leh thil dang eng emaw a bak an rawn tih theih chiam tawh si loh state sorkar-in kan chhonzawm ngai kha a tam a ni. Central sorkar-in min rawn hnutchhiah thil eng emaw scheme central atanga kan lo avail/kan lo tih ve dawn hian ngun deuhva kan ngaihtuah hmasak loh chuan, tupawh sorkar ila nakinah luhaina tam tak hi a awm thei dawnin ka hria a ni. Chuvang chuan vawiinah hian phurrit tlem-a-zawng chu ka phur ve a ni. A kal chak theih vak loh, a buaithlak khawp mai ! Kan ZMC te pawh hi a ni a. Kum 5 hnuah hian kan beisei dan chuan Medical Council of India-in approval min pe thei dawn chauh a ni. Chumi tihna tur atan chuan thla 2/3 danah inspection kha an rawn nei a. Surprise inspection an rawn nei a, Airport atang ten an rawn direct tawp a, khatiang inrin reng ngai kha a ni a. Tunah pawh hian staff indaihloh ti mai ila, deficiency a nasat em avang hian theihtawpin kan han la

nawk nawk a. Tunah hian ZMC bikah pheh chuan 20% chauh deficiency nei khawpin hma kan sawn tawh a ni. Thil kan tih dawn hian ka han sawi duh lai tak chu member zahawm tak te pawhin zawhna kan la nei nualin ka ring a. Chuvangin eng emaw chen chu sorkar thar a lo pian hian han tih zung zung theih si loh khatiang kha a awm a ni tih kha min hriatthiam pui sela tiin ka rawn sawi zau deuh hlek a ni. Ka lawm e.

**SPEAKER** : Starred Question 60-na zawt turin member zahawm tak Pu Lalrintluanga Sailo i lo sawm ang.

**PU LALRINTLUANGA SAILO** : Pu Speaker, ka Starred Question 60-na, Sports & Youth Services changtu Minister zahawm tak chhan atan - “Aizawl khawpui, AMC area chhungah Football stadium thar siam tumna a awm em ? Awm ni se khawiah nge sorkar-in dah a tum ?”

**SPEAKER** : Chhang turin Minister zahawm tak Pu Robert Romawia Royte kan sawm e.

**PU ROBERT ROMAWIA ROYTE, MINISTER** : Pu Speaker, ka lawm e.

Member zahawm tak Pu Lalrintluanga Sailo zawhna chhanna chu - Awm e, a hmun tur chu sorkar-in uluk takin thutlukna a la siam ang tih a ni e.

**SPEAKER** : Zawhbelhna, member zahawm tak Pu Zothantluanga i lo sawm ang.

**PU ZOTHANTLUANGA** : Ka lawm e.

Stadium kan nei dawn hi a lawmawm khawp mai a, AMC 8 chhungah 6. Hemi bakah hian Pu Speaker, Sports-a training centre hi tlang ram ni lo, khawlum hmunah hian neih dan awm se a tha lo maw tih hi ka ngaihnan fo a ni a.

All India level-ah competition hrang hrangah kan chhuak a. Tlangram boruak vawt angah khan kan training a, kan fit a. Nimahsela, kan competition tihna hmun tam ber chu All India hmun hrang hrangah pawh ni sela, khawlum tak, climate lum tak hnuaiah competition kan tih thin avangin kan chaklo thin a, kan zuk fit taw lo thin a. Chuvangin, football a ni emaw, sports discipline hrang hrangah hian vairam ti mai ila, India ram hmun dang ang climate hnaih deuh ber Sairang ruam,

Tlawng dung, khumi uap ruam angah te khuan training centre te hi neih ve ni ta se. Tichuan, khulai hmuna kan nau te, kan sportsmen te fit taka kan siam hian All India level-ah emaw, international level-ah emaw a selection kha khawlum tak hmuna a awm thin si avangin, hetiang ang te hi Sairang ruam angah te khuan a neih ve dan a awm ang em tih ka zawt e. Ka lawm e.

**SPEAKER** : Dr. Vanlaltanpuia, member zahawm tak zawt turin ka sawm e.

**Dr. VANLALTANPUIA** : Pu Speaker, ka lawm e. Hon'ble Minister, Sports & Youth Services Deptt. hnena ka zawhbelhna chu :

1. Lena Stadium, Serkawn, Melte-a sak mek hi engtikah nge hman theih a nih ang ?
2. India rama football inelna sang ber I-League kan tihah hian Mizo tlangval engzatin nge contract nei? Heng an contract sum tling khawm zat te hi kumkhatah engzat te nge ni thei tih ka zawt a.
3. Adventure sports lamah hian kan department hian engtia hmalak nge a tum tih ka zawt e.

**SPEAKER** : A neitupa hian a zawt leh dawn bawk si a, midang tan chuan a tlai tawh ti mai ang. Sports Minister hlui hi a phar tlai em mai. Zawhna neitu tunah i lo sawm ang.

**PU LALRINTLUANGA SAILO** : Pu Speaker, ka zawhbelhna chu hei hi a ni. Smart City Fund atangin Aizawl-AMC area chhungah hian football stadium thar 6 infiamna kan nei thei dawn niin a lang a. A tlangpui thuin Aizawl East, Aizawl chhuah lamah hian hetiang stadium hi kan nei nual tawh a. West lamah hian khatiang kha kan la nei lova, potential erawh kan nei tha viau a ni. Chuvangin, Aizawl West-I MLA constituency chhungah hian pakhat tal min dah sak thei ang em ? Entirnan, hmannah kan Sports Minister zahawm tak hian a hmun te pawh a en niin ka hria a. Khulai Kawnzau hmuna chuan hnuai deuh hlekah khuan hmun rai leh tha tak mai kha a awm a. Hengah hian min dahsak thei sela.

Tin, a kawng tur ang chiah pawh engmah harsatna awm lo a ni a. Tin, free land, la luah loh ram tam tak a awm a. Motor park-na ang tur chi te pawh awlsam zawka hma lak theih a ni a. Chuvang chuan Aizawl West-I area-ah hian football

stadium thar han siam tumnaah hian pakhat tal min dahsak thei ang em tih hi ka zawt a ni e.

**SPEAKER** : Chhang turin Minister zahawm tak Pu Robert Romawia Royte kan sawm e.

**PU ROBERT ROMAWIA ROYTE, MINISTER** : Pu Speaker, ka lawm e. Member zahawm tak Aizawl West-I bialtu Pu Zothantluanga zawhna te leh rawtna te pawh ni nghal deuh, khawlum lai deuh hmuna sports training-na hmun siam hi option tha tak a ni ang a tih lai leh a bial area te pawh tinzawn deuha rawn zawt te pawh niin ka ring a. Kha kha keini pawhin kan ngaihtuahna-ah a awm a. Sorkar hmasa lam te pawhin an ngaihtuahna an hmang tho in ka hria a. Hei hi kan lo chhinchhiah ang tih kha kan sawi theih leh kan chhan theih dan ni mai sela. Sairang area, Lengpui area-ah te pawh hmalak tawhna te pawh a awm a, hmalak mek leh tumna te pawh a awm a. Tin, heng bakah hian hmun remchang dang, khawlum, sport person-te state pawnah khawlumah an inkhelh thin avangin, chungka kal tur ten climate-ah te problem an neih loh nan sorkar-in ngaihtuahna a hmang a. Commitment angin sawi nghal thei lo mah ila chutiang tur chuan ngaihtuahna kan hmang a. Sairang area mai bakah Vairengte thleng pawh hian kan ngaihtuahnaah a awm a ni tih kha ka chhanna ni mai se la.

Tin, member zahawm tak Dr. Vanlaltanpuia zawhna, Lena Stadium hman theih a ni em ? Eng tikah nge hman theih a nih ang tih kha kei pawh, hman ni lawkah Lena stadium hi ka tlawh a. Sorkar hmasain hma an lo la nasa khawp mai a, a lawmawm a. Hman theih tura commission thuai tum a ni tih zawng khan kan sawi mai ang a. Mahse, han sawisel deuh leh han tih that ngai deuh hlek ngai sawi an neih erawh chu, “Running tract dik lo, a sei zawng dik chiah lo ang chi, siamthat theih dan te a awm ang em ?” an ti a. Kei pawhin ka va en chhan a ni a.

Tin, a football ground pawh football ti mite duh ang size a ni lo hret bawk a, siam rem that leh theihthe chu a nih ka ring a, a running track tak erawh saw chu tih sei leh dan pawh a harsa ang reng tawh a. Engpawh nise, a tlan tanna thin standard pangngaia ti lo a, tawlh hnung deuh atanga tlan tan a, khati zawnga nih kha chuan a metre tling thei ang zawnga tih theih turah te pawh ngai ila. Sawng saw enfel a nih a, payment lamah te harsatna a awm loh chuan hman tura peih thuai tum a ni tih a satu lampang UD & PA atanga feedback ka dawn dan pawh a ni e.

Tin, Dr. Vanlaltanpuia tho zawh belhna pahnihna kha India ram inelna sang ber I-League-ah hian Mizo players eng zat nge khel mek tih lai kha a figure ka sawi thei chiah lo a, mahse state khat atanga ISL leh I-League-a khel tam ber kan nih loh pawhin khel tam ber pahnih te zingah chuan Mizote hi kan telin ka hria a. Manipur khi an tam ve khawp mai a, kan tam zawk em tih ka chiang chiah lo a. Tunah hian I-League Club-te an han neih chhoh veah hian a hmaa tam ber thin kha min rawn khum ta nge kan inzah vel tih ka sawi thei chiah lo. Kan sum lak luh pawh a zat chiah sawi a harsa a. Department lam atangin hetiang hi chhinchhiah pawh a awm chiah loin ka ring a. Mahse, sum tam tak kan players-ten heng professional league atang hian an lalut a ni tih kha ka sawi theih ni se.

Tin, sport-a hmalak zel tumna tih lai hi chu hmalakna hrang hrang sawi tur tam tak a awm ang a. Kan hmalakna tam tak, sorkar hmasa lama an lo tih tawh chhunzawm ngaite a awm a, kan chhunzawm zel bawk a. Tin, sporting activities tak tak zawk, infrastructure mai ni lo, a medal tinzawn zawng leh sports tak tak tinzawn zawng pawh hian tan lak kan tum a. Chung atan chuan Mizoram State Games-te pawh Council of Ministers chuan nei turin ruahmanna a tifel tawh a, chuta tana sum ngai turte pawh budget-ah dah thlap a ni a. Hei hi a pawimawh em emna a awm a. Khawvel huap chuan Olympic Games a awm a, India ram huapah National Games a awm a, North East huapah North East Games te a awm a, chungah chuan discipline tam takah an inel a. Mizoramah kan neih ve loh avangin khatianga inchhawp chhuahna leh qualifying round tha ang chi kan nei lo a, National Games leh North East Games-ah te pawh kan che tha hlei thei lo a ni tih kan hre vek a. Tunah chuan a bul thut atanga tan chhovin Mizoram State Games kan han nei ang a, District leh Block level-ah te pawh activities a tam ang a, discipline tam tak medal tamna si, athletics lamah te, kan field events hrang hrang te, swimming leh aquatics lamah te, medal tamna a ni a, heng hi Mizo-in kan uar ta lo riau mai a, chungte chu kan uar thar leh ang a. National Games lamah te pawh kan ranking te pawh tih san kan tum a. Sports infrastructure lamah pawh hma lak zel kan tum a ni tih ka sawi duh bawk a ni.

Tin, zawhna neitu Pu Lalrintluanga Sailo zawh belhna, Aizawl West-I lamah hian stadium/football ground thar siam tuma dah ve ni se, dah ve tumna a awm ang em tih lai hi chu - ni e, a awm khawp mai a, Aizawl West-I lamah hi chuan. Standard football ground hi kan nei miah lo a, veng lian tak tak, football thiam tak

tak tamna vengte pawh a ni hlawm a, heti lai hi a ngaih pawimawh awm khawp mai a, kan hotute nen inrawnin kan sawiho zel ang a. Kawnzau han tihte pawh hi hmun tha tak mai a ni a, chance chu a tha khawp mai ti zawngin sawi mai ila a tha mai ang e, Pu Speaker, ka lawm e.

**SPEAKER** : Starred Question 61-na zawt turin member zahawm tak Dr. Vanlaltanpuia ka sawm e.

**Dr. VANLALTANPUIA** : Pu Speaker, ka lawm e. Hon'ble Minister, Health & Family Welfare chhan atan a ka zawhna chu :

- a) Mizoramah ei leh in thianghlim, hrisel leh him dam chauh zawrh a nih theih nan sorkarin 'Food safety measures' engtin nge a lak mek?
- b) Food testing laboratory hi khawiah te nge kan neih tih a ni.

**SPEAKER** : Chhang turin Minister zahawm tak Dr. R. Lalthangliana ka sawm e.

**Dr. R. LALTHANGLIANA, MINISTER** : Pu Speaker, zawhna pakhatna chhanna chu Mizoram State-ah hian India ram state dangte ang bawkin Food Safety & Standards Act, 2006 Rules 7 and Regulations, 2011 hmangin ei leh in thianghlim chauh zawrh a nih theih nan hma lak chhoh mek zel a ni a. Hmalakna thenkhatte chu -

- i) Awareness campaign NGO hrang hrang leh zirlaite nen neih thin a ni a
- ii) Radio/TV hmanga ei leh in chungchang inhriattirna ang chi pek (**SPEAKER** : Ngawi rawh aw, question hour a tawp a, chhang zo law law rawh se aw. Le, chhang zo rawh le)
- iii) Ei siamte leh zuartute training peka hmalakna ang chi te
- iv) Tin, inspection leh sampling tihte a ni.

Zawhna pahnihna chhanna chu Assam State Food Analyst, State Public Health Laboratory, Guwahati chu Mizoram sorkarin a ruai mek a, food sample tam zawk chu hemi hmunah hian test tura thawn a ni thin a. Anni hian a dik leh dik loh, ei leh in tlak a ni em tih kha min certify thin a ni.

Tin, tunah Central Medical Store, Zemabawk, Aizawl-ah Food testing laboratory-ah khawl leh hmanrua te Commerce leh Industries Department-in an lei chu an install zo tawh a, an dah tawh a. Amaherawhchu, thawktu pangngai an la awm loh avangin hman tangkai theih a la ni lo a ni. Health Department kutah hlan chhawn a la ni chiah lo bawk a ni. Hei hi Pu Speaker, i hun lai, i chan laia hmalakna niin ka hria a, a lawmawm khawp a. Amaherawhchu, a nih dan tur angin a la function lo a ni tih kha ka chhanna a ni. Tin, khami piah lamah khan thil lawmawm deuh mai Government of India atangin kan nei dawn a. Pu Speaker, vanneihthlak takin keimahni kan in set up hran hlauhna tur, food te leh khatiang chi kan test-na tur laboratory-te leh thawktuten an luah tur building sakna tur atan ₹ 250 lakhs tun hnaiah min rawn ngaituah sak a, kan lawm khawp a. Chumi rualin heta nursing school kan tih ang lo deuh khan he scheme hi chu kan take up dawn a ni. A chhan chu thawktu tur min rawn pe thei dawn ta a, chu mai ni loin equipment man to tak tak, sophisticated equipment tangkai tur ang chi te, pesticides kan tih ang chi test-na tur zawng zawng kha kan nei thei dawnin ka hria a. Vanneihthlak takin Secretariat Complex, Capital Complex area-ah hian hmun tha tak mai min pe nghe nghe a. Hei hi hun reiloteah sak tan theih kan inbeisei dawn a. Tun atanga kum tam lo teah chuan a takin, puitling takin helamah hian hma kan la thei dawn niin ka hria a. Chu chu kan neih mek han tih khan neih mai tur kan neih kha ka rawn chhang tel a nih chu. Ka lawm e.

**S P E A K E R** : Aw le, zawhna leh chhanna hun a zo leh ta a (Dr. Vanlaltanpuia : Pu Speaker, ram tan thil pawimawh deuh ka sawi dawn a nia, zawh min phalsak leh hram rawh vawi khat chiah chu) Ngawi rawh, a tawp tawh si a, demand-ah i sawi vak dawn nia, demand sawi hunah aw.

Business dawtah kan kal ang a, Laying of Papers. Tunah chuan Chief Minister zahawm tak Finance changtu ni bawkin kan House-ah hian heng –

- i) Finance Accounts 2017-2018 Volume-I relating to Government of Mizoram.
- ii) Finance Accounts 2017-2018 Volume-II relating to Government of Mizoram.
- iii) Appropriation Accounts 2017-2018 relating to Government of Mizoram te hi House dawhkanah rawn lay se, i lo sawm ang.

**Pu ZORAMTHANGA, CHIEF MINISTER** : Pu Speaker, i remtihna leh House remtihna in he House dawhkanah hian heng te hi ka rawn lay e –

- i) Finance Accounts 2017-2018 Volume-I relating to Government of Mizoram.
- ii) Finance Accounts 2017-2018 Volume-II relating to Government of Mizoram.
- iii) Appropriation Accounts 2017-2018 relating to Government of Mizoram. Ka lawm e.

**S P E A K E R** : A copy kha sem ni se a tha ang e. Aw le, kan chan kim chuan pahnihaah Pu Dr. R. Lalthangliana, Minister zahawm takin “ The Separate Audit Report of the Comptroller & Auditor General of India on the Accounts of The Mizoram Khadi and Village Industries Board, Aizawl for the year ended 31<sup>st</sup> March, 2016 ” chu House dawhkanah rawn lay turin kan sawm e.

**Dr. R. LALTHANGLIANA, MINISTER** : Pu Speaker, i remtihna leh he House remtihna in ‘ The Separate Audit Report of the Comptroller & Auditor General of India on the Accounts of The Mizoram Khadi and Village Industries Board, Aizawl for the year ended 31<sup>st</sup> March, 2016 ’ hi he House-ah ka lay e.

**S P E A K E R** : A copy kha han sem leh ula. Nimina member zahawm tak Pu Duhoma rawn sawi pawimawh tak kha kan rawn ti tha leh nghal e, a copy kha sem tur khan kan rawn buatsaih leh nghal a ni, Tourism chungchang kha. Kan chang kim em ? Kan chankim hmel e.

Tunah member zahawm tak Pu L. Thangmawia, Chairman, Committee on Local Fund Accounts kan sawm ang a, the Statement of Action taken by the Government against Committee on Local Fund Accounts (COLFA) Further Recommendation contained in the Sixth Report on Technical Inspection Report on Local Administration Department on Urban Local Body and Rural Local Bodies for the year 2013-2014 relating to Local Administration Department tih chu House dawhkanah rawn lay se, kan sawm e.

**Pu L. THANGMAWIA** : Pu Speaker, i phalna leh he House zahawm tak remtihna in ‘ Statement of Action taken by the Government against Committee on Local Fund Accounts (COLFA) Further Recommendation contained in the Sixth



Report on Technical Inspection Report on Local Administration Department on Urban Local Body and Rural Local Bodies for the year 2013-2014 relating to Local Administration Department ' hi he House Table-ah ka rawn lay e.

**SPEAKER** : A copy kha han sem leh ula

**PU LALRINTLUANGA SAILO** : Pu Speaker, 'The Separate Audit Report of the Comptroller & Auditor General of India' tihah hian mistake a va tam ve mawle aw ! Entirnan, Appendix III-ah te khan mihring hming hi a dik dawn em ni; Lalzamlawna, Maubak tih te, Chhandawmi tih te, Aizawl tih te pawh a spelling a dik lo – a ni. Khatiang chi kha a awm nual mai ka ti.

**SPEAKER** : A lawmawm e. Kan lo uluk dawn nia. Mihring kan ni a, computer khawhtute tihsual palh te pawh a awm ve thei a nia. Khatianga member ten an rawn en chat chat kha a lawmawm a ni. Kan chang kim maw? Tunah chuan Presentation of Report ah kan kal leh rih ang a, member zahawm tak Dr. ZR Thiamsanga, Chairman Subject Committee-III in heng i) 'First Report on Actions taken by the Govt. on the recommendations contained in the Eleventh Report of the Subject Committee-III relating to Rashtriya Swasthya Bima Yojana (RSBY) under Health & Family Welfare Department' tih leh ii) 'Second Report of Subject Committee-III relating to National Mission on Oilseeds & Oil Palm under Agriculture Department' tih te hi House dawhkanah rawn lay se.

**Dr. ZR. THIAMSANGA** : Pu Speaker, i phalna leh he House zahawm tak remtihna in 'First Report on Actions taken by the Govt. on the recommendations contained in the Eleventh Report of the Subject Committee-III relating to Rashtriya Swasthya Bima Yojana (RSBY) under Health & Family Welfare Department' hi ka present e. Pu Speaker, i phalna bawk leh he House zahawm tak remtihna in 'Second Report of Subject Committee-III relating to National Mission on Oilseeds & Oil Palm under Agriculture Department' hi ka present e.

**SPEAKER** : A copy kha han sem ula. Tuna kan Deputy Chief Whip zahawm tak Pu Rintluanga Sailo rawn sawi kha Audit lampang, vaiho tih a ni a, Mizo hming hi an lam dik thei lo pawh a ni mahna. Mizoram chhung amite an nih loh avangin uluk leh zual tura hrilh te chu kan lo tum ang e. CAG lam tih daih a ni a kha thil kha. Kan chang kim maw? A lawmawm e. Tunah chuan budget discussion

nimina kan tih kha kan chhunzawm leh ang a. Kan hriat tlan angin ni 13, June-a kan Chief Minister zahawm tak Finance changtu ni bawkin kan annual budget 2019-2020 a pharh tak kha kan sawiho leh ang a. Nimin khan mi 17-in an sawi tawh a, a time kha a ngai kan ti leh ang a. Tunah sawihona kan tan leh nghal ang a. Tunge sawi hmasa leh ang le? Member zahawm tak Pu Vanlalhlana i lo sawm ang.

**PU VANLALHLANA** : Pu Speaker, ka lawm e. Vawiin general discussion wawi hnihnaah hian a hmasa ber ka'n hauh ve a. Nimin lamah te ngaihnaawm tak tak kan ngaithla a, wawiinah te pawh kan la ngaithlak zawm leh turah ngai ta ila. A hmasain lawmthu te pawh ka'n sawi ve ang a, kan sawiselna te pawh dawnsawn a ti nuam deuh ang chu maw. Chief Minister, kan Finance changtu bawh hian budget mawl te, hriatthiam awlsam tak mai a rawn present a, keni rilru chak lo, thil hriatthiam harsa ti te tan pawh awlsam taka hriat theih turin a rawn present a. Budget mawl te leh hriatthiam awlsam taka a rawn present avang hian a lawmawm ka ti a. Kei pawhin ka hre ve ta teuh pawhin ka inhria a ni.

A dawt lehah chuan, budget uluk taka han thlir hian ram min thlirpuiin ka hria a. Chutiang chu a hlimthla a lang theiin ka hria a. Amaherawhchu, chu ram kan thlira chu min hruai thleng thei em tih chu hunin a hril ang a, an hnathawhna te pawhin a hril turah ngai ta ila. Kan thenawm state-te pawhin budget session an nei thliah thliah a, Meghalaya-te, Nagaland-ah te chuan deficit budget present a ni a. Chief Minister tho kha Finance Minister, Finance changtute an ni a. Keini hian budget pangngai kan han present thei te hi a lawmawm a, state thenawm budget deficit ai chuan a tha zawkah te ka ngai a ni.

Tin, budget-a lang lem lo, thil lawmawm lam a nih leh nih loh phei chu ka hrelo a. He sorkar hian austerity measures sum renchemah hian kal nat a tum hlein ka hre mai a. Budget bu khaina bag kha a man a to vak lo ang tih a hriat theih a. Sum renchem vangah ka ngai ringawt a. Kan lehkhabu te a chhah ropui mai si a, a then phei chu a khainain a dawl lo a. Chutiang chu a ni a, a aia tha deuh te kha kan phu em aw tihte ngaihtuahnaah a awm a ni Pu Speaker.

Planning Commission-in thil tih dan phung thar a rawn siam chhuak ta a. India rama state tam zawk hian February thlaah budget session an nei vek a. Sorkar kumthar pangngaiah budget thara sum ruahman te an hmang chho nghal a. Keini Mizoram hi Parliament ruala inthlang pawh kan ni ve lem lo a, state dangte ang lo

takin March thlaah session te kan nei a, vote on account te in kan kal a. Amaherawhchu, India ram state tam zawk, MP ruala inthlang ve lo te chuan March thlaah budget session an nei tawh lo a ni tih te kha ka han tarlang hmasa duh a ni.

Tichuan, kumin chhunga sum hman tur zat hi vaibelchhe 10,692.30 a ni a, a tam viau mai a. Heta tan hian capital expenditure, hmasawanna hnathawhna tur atan vaibelchhe 2,288.78 a ni a. A tam viauin a hriat a, amaherawhchu nikum aiin vaibelchhe 254.78 in a tlem zawk a ni a ti tlat mai a, hmalam pan kan tum laiin nikum pawh kan phak lo hi a paw ka ti a, chu chu he budget-ah pawh hian a langsar viauin ka hria.

Tin, Finance Minister statement-ah hian, budget speech-ah a lang miah lo na a, thil chiang tak chu Mizoram sorkar thar lo ding hian mipui-te phur ti rit turin chhiah a la dawn tih hi a chiang a ni. State owned resources-ah nikum lam aiin kan sang dawn a ni tih a tarlang a. Nikumah chuan zu chhiah te lak a ni a, vehicle tax pawh sang takin lifetime a lak a ni a. Chumi chu a awm dawn tawh si lova, zu chhiah a awm dawn tawh lova, lifetime tax pawh tihdanglam a lo ni a.

Hetia han ngaih mai hian state owned revenue hi a tlem tura rin a ni. Amaherawhchu nikum zu chhiah kan lakna a pung thur mai pawh kuminah hian kan khum dawn a nih chuan electric bill man a to dawn a, tui bill man leh thil chhiah chi hrang hrang atang hian pawisa tuak a nih loh chuan a ngaihna a awm si lova, chuvangin eng eng-ah te hian nge tax lak a nih dawn tih hi sawi chian ni nghal law law se chu ngaihtuahna pawh kan hmang thiam deuh turah ka ngai a ni.

Pu Speaker, tun February ni 25 khan Governor hian Socio-Economic Development Programme chu Mizoram sorkar flagship programme a nih thu a puang a. Hemi ni vek hian Government order dang chhuah a ni a, chutah chuan budget bu leh a kaihnawih zawng zawngah New Economic Development Policy tih leh New Land Use Policy tih zawng zawng hi Socio-Economic Development Policy-a thlak vek tur tih order a ni. Thil tih awm tak pawh a ni e. Flagship programme ber thlak a nih chuan officiala khatiang order chhuah pawh kha tih awm tak a ni. Mahse Pu Speaker, Finance Minister budget speech kan en chuan thlak a ni dawn lo chiang mai tih a lang a. Kan Chief Minister ngei hi he order bawhchhe hmasa ber hi a ni ta mai awm mang e a tih theih hial a ni. Budget speech kan en chuan NEDP project enkawl zui nan leh tihhlawhtlin nan vaibelchhe 110 dah a ni tih

te rawn tarlan a ni ta a. Sorkar thu a inkalh a ni. Nge ni a, flagship programme hi 2 kan nei ta zawk ? Chuvangin hei chauh hi ni lovin budget document hrang hrang-ah pawh thlak danglam a la ni lova. NEDP tih te, NLUP tih te a la chuang a ni tih kha ka rawn tarlang duh a ni.

Pu Speaker, kan House Leader khan SEDP kalpui nan cheng vaibelchhe 750 dah a ni tih a puang a, lawmthu te kan han sawi tliar tliar a, amaherawhchu lawmthu sawina tur a awmin ka hre lo. Vaibelchhe 750 hi SEDP atan hian a tlem a ni. MNF Vice President hi SEDP duang chhuaktu, mithiam ho khawma programme duangtu Committee Chairman a ni a. Mizoram mipui hmaah hmun tam tak-ah SEDP atan vaibelchhe 1,000 aia tlemlo dah tur a nih thu hi a puang a ni. ‘Kan sorkar atanga budget session hmasa berah SEDP atan cheng vaibelchhe 1,000 aia tlemlo kan dah ngei ngei dawn’ tih sawitu, Vice President, MNF, a sawina hmun YLA Hall, Lawngtlai, a sawi hun ni 24, April, 2017. ‘MNF kan sorkar chuan SEDP-ah cheng vaibelchhe 1,500 aia tlemlo kan dah ang’ tih a sawitu, Vice President, MNF, sawi hun ni 25, June, 2017, sawina hmun : IPR Conference Hall, Aizawl. ‘Kan sorkar chuan SEDP-ah cheng vaibelchhe 1,500 kan dah nghal ang’ sawitu Vice President, MNF, sawi hun : ni 15, January, 2018, sawina hmun : Hnam Run, Lunglei. Mipui hmaa min zirtir chu cheng vaibelchhe 1000 aia tlemlo hi SEDP-a sum dah tur thu a ni. Chumi ring chuan a ni mipui ten he sorkar hi an din ni.

Kan House Leader hian ‘cheng nuai 3 kan sem ang, kan sem vek ang, chhungkaw tinin in dawng ang. NLUP dawng tawhte pawhin in dawng vek ang’ a tih kha mipuiin kan awih a ni. Chumi tiawihawm tur chuan MNF Vice President, SEDP chairman ni bawh chuan vaibelchhe 1,000 aia tlemlo kan dah dawn tih kha a puang bawh a ni. Chumi 2 chu mipui ten kan awih avanga he sorkar hi vote a, din tir kan ni. Chuvangin MNF Vice President hi Finance Minister ni ta se vaibelchhe 1,000 hi chu a dah ngei ngei ang tih ka ring a ni.

Pu Speaker, budget speech-ah hian sum hmanna tur pawimawh zual tarlan a ni a. District thar siam te, Health Care chungchang te leh thil dang tam tak kan sawi vek seng lo ang a, amaherawhchu tarlan loh langsar tak mai, ngaih pawimawh em em ka neih chu Agriculture leh Horticulture hun hmasa lama kan House Leader pawhin a pawimawh a tih avanga a chan chat kha a ni a. Tunah chuan pawimawh zualah hian tarlan a ni ve ta lo a ni. Tin, power siam chhuah chungchang pawh tarlan

a ni lo a ni. Mizoram-ah power potential kan nei tha em em chungin engmah khati zawng khan tarlan a ni lo a ni.

Hun hi a kal duak duak mai a, Pu Speaker, ka confuse ta deuh tlat mai ka point sawi tur tam tak pawh. Kan hre vek a, kan House Leader hi NITI Aayog meeting neiin Delhi-ah a kal a. Chutah chuan Mizoram tana thil pawimawh tak tak a zu sawi a, amaherawhchu chuta a zu sawi chu he budget bua pawimawh zual tarlan loh vek kha a ni ta thung a ni. Rain water harvesting chungchang te, bamboo development chungchang te, agriculture development chungchang te Niti Aayog-ah tarlan a ni a. Thil hi a sawina hmun a zir hian a danglam zel dawn em ni Pu Speaker ? A buaithlak awm mang e.

A tawp berah chuan kan sawi hram duh chu Pu Speaker, Mizo kan ni a, kan ramah kan cheng a, kan him tur a ni a, kan hlim bawk tur a ni. Tunhnaiah Central Young Lai Association ten area population census an nei a, chu chu an khawmpui thurel bawhzuiin a ni. Chu chu duh lovin Young Chakma Association leh CADC hnuuia khaw thenkhat VC ten an dodal niin a hriat a, hei hi thil serious tak niin ka hria a.

Census record leh statistical handbook te kan en chuan 2001 census ah Lawngtlai District-ah mihring 73620 an awm a, 2011 census-ah khan mihring 1,17,894 an tling a. Kum 10 chhunga an punna hi 60% aiin a tam a ni, 60.14% a ni ! Chuvangin foreigner ten an chiahpiah nasa tih an hriat avangin Young Lai Association hian hma an la a ni mai. Chutiang laia foreigner hum tum ang zia zanga Chakma ten hetiang a hma an lo la hi a pawl hlein ka hria. Pakhat leh chiah, Chakma District-ah Rajivnagar-ah khuan Mizo ten inhmun kan nei thei lo, vawiin thlengin cheng duh pawh awm se an la nei thei lo. Biakin ding te pawh khu Chakma hmingin pass an siam a, chumi hnuah sak chauh a ni. Chuvangin kan ramah kan cheng a, kan him tur a ni a, kan hlim bawk tur a ni a, chuvangin chumi ti tur chuan sorkar hian nasa takin mawh a phur a ni. Pu Speaker, ka lawm e.

**SPEAKER** : Aw le, a tha e. Member zahawm tak Pu L.Thangmawia i lo sawm ang.

**PU L.THANGMAWIA** : Pu Speaker, ka lawm e. Ka rin aia hmam budget tha tak mai kan nei a. A hmasain Finance changtu kan Chief Minister

zahawm tak leh hah taka thawktu Finance Department lam te pawh lawmthu ka hrilh duh a. A chhan chu hun kalta han en ila, inthlan kum dawt chiah hi chuan budget hi kan lo pass har em em mai thin a lo nia. 2009-2010-ah te khan interim budget-in a kal phawt a, October ni 15-ah budget kan hmu chauh a ni. Tin, 2014-15-ah khan 'vote on account'-in a kal chho ngar ngar a. November ni 11, 2014, Thawhlehi-ah full budget kan hmu chauh a.

Ka lo beisei dan chuan 'ber' thla chho velah hi chuan kan hman mai ang chu maw, inthlan zawh kum te a nia tih ngaihnan mai mai ka mimalin ka lo nei a. Amaherawhchu, June thlaah vote on account-a kan pass chin pawh hmang zo lo tak maiin kan han nei thei a. Chuvangin helaia rim taka thawkte chungah khan lawmthu a hmasain ka han sawi duh a.

Tin, he budget hi famkim vek chu a ni lovang a. Amaherawhchu, lawmawm em em mai, nidanga kan hmuh ngai loh hlawm lian deuh deuh awmin ka hria a. Chutah chuan a hmasa berah chuan Zirna. Zirnaah hian elementary education lam hi a rawn focus a he budget hian. Tah chuan tuna kan harsatna awm tho mahse, a sang lamah chuan RMSA, tin, College lamah RUSA te a lo awm a, CSS. Elementary-ah hian tunah hian kan chhe em em mai a ni.

Tunah pawh hian Mizoram pum chu ka hre lo a, ka bial bikah zirtirtu zat SDEO ka han tabulate tir a, hmanni khan min rawn thawn a. Zirtirtu 1 awmna te, 2 awmna te kha kan lo la nei nual mai a ni. Chuvang chuan he budget-in elementary education a rawn target hi MLA zahawm tak tak he House ami zawng zawng hi an lawm ve tho ka ring a. An bial ah a nih ve tho ka ring a.

Tunah hian sorkar-in a lak thar hma atan ka fund atangin zirtirtu elementary-ah 10 chuang tunah hian ka ruai mek a ni. A ngaihna a awmlo, class la tur kha an indaih thei lo a. Chuvang chuan he budget-a a lawmawm lai a nia. Tin, zirna kaihnhawih thoah thil thar rawn lang a awm a. Budget bu, demand for grant phak 217-naah khan kum danga kan la hmuh ngai loh study tour kha nuai 50 a rawn awm a ni. He nuai 50 hi chuan zirlai tam tak an kal thei ang a .

Pachhunga College-ah te pawh kum 1-a zirlai study tour kan hruaina hi nuai tam a ni miah lo a. Nuai 50 hian mamawh zawng zawng puhruk lo mahse tuna college zirlai tam tak study tour mamawh te hi a rawn kaltir thei dawn a. Hei hi

budget bu dang ka en ve phak chinah ka lo hmuhhmayh a nih loh chuan Pu Speaker, la awm ngai miah lo, thil thar a niin ka hria a. Chuvangin zirlaite pawh an lawm ve ka ring a. Zirna kaihnawihah chu chu ka han sawi duh bawk a.

A dawtlehah chuan, a hlawm hnihnaah chuan thalaite tan he budget hi a lawmawmin ka hria. Sports ah hian, sport tui tam tak kan awm a, kan ngaihsan zawng pawh a nia, khawvel ang pawhin, Mizoram-ah pawh. Nuai 1,000 dah an ni phawt mai a, a tul tula hman atan. Skill Development-ah nuai 500 a nia. Tin, kum danga a daihloa dah thin, a hranpaa dil chawp reng ngai mai, sport incentive-ah nuai 100 dah a ni bawk a. Hei hian a daih loh pawhin a daih teuh viau ang a, a daih pawh ka ring a, kum danga an sem tawh dan en in.

Chuvang chuan hemi 3 ringawt atang pawh hian thalaite oriented budget a niin ka hria a, Pu Speaker, a lawmawm khawpin ka hria a. A hman lam kan hman that chuan hemi ringawt atang pawh hian thalaite tan thil tam tak skill development-ah te, tin, sport lama hma kan sawnna tur ten a kal dawnin ka hria a, a lawmawm ka ti khawp mai.

Tin, a dawtlehah, a hlawm liana ka then leh chu Health Care a ni a. Hei hi he budget hian a focus bik em maw ni aw tih mai tur a ni. Thawktu indaihlohna ah doctor leh nurse te atan hian pawisa tam tak mai dah a ni a, nuai 5,000 lai mai. Hei hi Pu Speaker, i remtihna ka sawi belh duh deuh chu hriselna lamah hian Mizoram pum ang pawhin hmasawn kan ngaihna a awm a. Ka bial angah te pawh hian Sub-Centre awm miah lohna hi khaw 4 a la awm a ni. Hrianghmun, Changzawl, Vankal leh Puilo-ah te. Changzawl te phei chu ka zin chhoh lai hian an vaccine la tur te inpaw bawr chungin, raipuar chung ten an kal avangin ka khawngaih a, Health Minister leh Department remtihna tunah hian MLA fund in Health Worker ka rawih sak ringawt a ni.

Chuvangin heng ang chi te pawh hi he nuai 5,000 atanga a daih theih chuan a mamawh zual khua bik, an khaw thenawm va hla deuh bik emaw, khang-ah te pawh khan health clinic centre tihchangtlun nan leh Health Worker 1 tal dah theih nan te pawh hian, kan la pass chiah lo a budget hi, nakinah kan pass a, a hman theih hunah khang atan te pawh khan a concerned Minister te pawhin min lo chhinchhiah sak se ka duh hle a. Demand sawi hunah phei chuan a rem leh kan sawi leh tho ang a.

Tin, chu mai a la ni lo a, corpus fund atan nuai 5,000 bawk kha dah a ni leh a ni, Health Care Scheme atan. Chu chu a la ni mai lo a, Assistance to Health-ah nuai 2,000 a la awm leh bawk a ni. Chuvangin, MLA te pawh kan buaina ber a nia. Damlo rethei si, an sum neih vang ni loa kan bial damdawi in atanga an rawn refer, puk chawpa a motor rawn hire kan lo buaipui hi a tam em em a. Thihna an tawh phei chuan an pawisa neih zawng zawng inenkawl nan an hmang zo tawh a, an hawna man te hi MLA-in kan tum sak a ngai fo a ni. Chu chu thingtlang bialtu lam chuan kan hriatsa a ni a. Chuvang chuan health care-ah hian thingtlang lam thleng phak kan tih phei chuan, refer te pawh a tlem theih deuh phei chuan, khangte pawh kha kan inchhawk zangkhaina a ni dawn a. He budget hi health care oriented a ni ti te pawhin a sawi theih awm e, Pu Speaker.

Chumi lo thil pui tham deuh mai pakhat, a hlawm 4 nana ka sawi duh chu kawng chungchang hi a nia. Kawng hi PWD changtu leh kan Chief Minister zahawm tak hian sorkar lakluh a nih atang khan vei berah a neihin ka hria a. He House zahawm tak kaltlang hian lawmthu pawh ka sawi duh a. Kawng buai hian a buai, kawng hi a atchilh, a finchilh kan ti zawk dawn nge, a ni ber maiin ka hria a. Ka bialah ringawt pawh hian tun kan sorkar budget thar hman hma hian nuai tam tak tunah hian kawng atan kan hmu hman tawh a ni.

Chu chu tunah hian kan mamawh em em bik a awm a, economic road deuh Saitual-Saichal kawng kan han tih ang chi te. Tin, constituency 2, Pu Speaker, i constituency leh ka constituency inkalpawhna ni bawk, inter-state atan tangkai bawk, Chiahpui-Daido chungchangte pawh hi concept paper te pawh an thehlut tawhin ka hria a, Chief Engineer lam atangin. Hengte pawh hi tuna kawng atana nuai 15,000 kan han dah te; tin, Road Fund Board atana nuai 5,000 kan han dah te hian a daihlo deuh a nih pawhin NABARD loan leh thil dang atang pawhin ngaihtuah a tha in ka ring a. Chu chu ka ngen duh nghal ni bawk sela.

Kan sawi zau lawk ang a. Pu Speaker, loan hi lak dan a zir hian tha deuh hi a awmin ka hria a. Kan budget pun chhoh dan han en pawh hian kum 3 hnua kawng laih leh tuna laiha loan puk kha a hlawk zawk dan a awm thei a ni.

**PU L. THANGMAWIA** : In sakah pawh hian a nia Pu Speaker, bank loan hi a hlawk em emna chu, tuna kan in hmun man leh kan in sakna ai hian a hnua bank pung kha a hlawk lo zawk tlat a ni, kum 10/20 a han kal hian. Chuvangin



khatiang ang hmasawna ruhrel pawimawh bikah hi chuan ₹ 170 crore lai NABARD loan tur pawh an dah a, hei pawh hi han extend belh deuh hret hi kan sorkar hian pawh ti lo sela, a hna tur a zir zawkin. Nakinah to deuha laih leh ai khan tuna thil tlawm laia laih mai khan sorkar kha hlawk zawk theih dan a awm ve tlat a ni tih ka sawi duh a.

Sawi tur a tam khawp a, PAHOSS te pawh hi ₹ 6,000 lakh lai a awm a, hei hi Mizoram pum puia MLA fund zawng zawng zat lawih a ni. Mahse hei hi mipuite support-na kan mamawh dawn khawpin ka hria a, ka survey ve mai mai a. Kan mamawhna lai zawn takah te in neitu ten an lo hralh phal te a ngai a. Tin, ngaihtuahna kan hotuten an hmang mek a, an hman belh tura ka duh deuh pawh Pu Speaker, hmun lun lai deuh angah te hian in hmun lei khawma parking atan chauha tih te pawh hi rilru ah awm chho sela. A nih loh chuan an phal chin te te PAHOSS kaltlanga an rawn tih kha chuan tuna kan traffic jam hi kan tum angin a sawt lo thei a. Amaherawhchu, heti zat sum dah phal Chief Minister zahawm tak kan nei a, hei hian mipuiten kan support chuan thil tam tak a khawih kaw dawn a ni, ₹ 6,000 lakh hi a scheme ang taka mipui tawiamna kan hmuh chuan kan traffic jam chu kawng tam takin a solve dawn tih kha ka hmuh dan a ni .

A tawp berah Pu Speaker, sawi loh theih loh pakhat chiah chu, sorkar hma atanga commitment lo neih tawh DC office 3 tih changtlun nan ₹ 150 lakh theuh an han dah nghal te hi a ropui khawp mai a. Tuna DC function mek Mamit ang te pawh hi kumin budget han en ila, phok 112-naah hian ₹ 289.29 lakh a ni a. ₹ 150 lakh hi a ding tir, office la run lohah chuan a tlem miah lo a ni. Chuvang chuan hetiang budget awmze nei, budget mipui huapzo tur leh awmze nei tur tak kan nei hi a lawmawm a. Amaherawhchu, a pawimawh ber zawk erawh chu mipuiin min tawiamna leh dik taka kan hman kha a pawimawh dawn a, chumi ti thei tur chuan thahnemngai takin ka han sawi a ni e. Pu Speaker, ka lawm e.

**SPEAKER** : Hun i hmang tha e. Dr. B.D.Chakma i lo sawm ang.

**PU B.D. CHAKMA** : Pu Speaker, ka lawm e. A a figure-a ka sawi chuan hun a rei lutuk ang a, chuvang chuan points pawimawh deuh deuh chauh ka sawi ang e. He budget speech-ah hian kan Chief Minister leh Finance Minister zahawm tak ni bawh hi Finance Department lam atangin an chhiar tir a, figure diklo tam tak chu phok 2/3-ah hian a awm a. Page 6-naah hian budget estimate ziah kha

2019-2010 tih khan an ziaak a, chu mai bakah page 8-naah hian point 15-na pawh khatiang bawk khan an ziaak a, 2019-2010. Tin, phok 15-naah pawh point 16-naah hian khatiang bawkin wrong entry a awm a ni. Chuvangin he thilah hian Department atangin seriousness a awm lo nge, an chhiar tha lo tih kha ka zawhna a ni a. Chu mai bakah budget bu dahna bag pawh hi a nalh lo khawp mai a, bazar bag ang chiah a ni a. Term hmasa khan bag nalh deuh deuh pure leather ang kan dawng a, hmng pawh a lang vek a, B.D.Chakma tiin MLA zahawm tak te hmng a lang a, tichuan pure leather a ni a. Hetiang bazar bag ang budget bu thun hi a mawi lo khawp mai, House tan pawh hian a zahthlak a ni, Pu Speaker. Chuvangin next year-ah chuan bag nalh deuh deuh ah budget bu hi thun thei se ka duh a ni.

Tin, Fund Allocation, elected representative hnenah dik takin MLA LAD Fund ₹ 50 lakh-a tihpun kha chu lawmawm ka ti a. A chhan chu dik takin opposition MLA-te chu MLA LAD fund bakah area hmasawn nan untied fund MLA duh zawngin, mipui duh zawngin, asset siam nan MLA LAD fund chauh kan nei a. Chuvangin ₹ 100 lakh atangin ₹ 150 lakh-a tihpun hi a lawmawm ka ti a. Chumi rual rualin thil thar pakhat heta ka sawi duh chu Pu Speaker, thil thar deuh a ni a, House-in tun thlengin an la sawiho lo va, elected representatives, MDC leh MLA chungchang chauh kan ngaihtuah thin a. Village Council representative chungchang hi tun thleng hian kan ngaihtuah lo a, remuneration hi a tlem lutuk, VCP te chu ka hriatsual loh chuan thla khatah ₹ 500/₹ 600/- chiah an dawng thin, hlawh pawh an ti ngai lo, remuneration an ti ringawt a. Secretary hi ₹ 500/- vel chauh a ni a, VC members ten ₹ 450/- bawr vel chauh an lak thin lain, anmahni pawh elected representative an ni a. Remuneration tlem hi corruption siamna remchang a ni a. A chhan chu MLA te leh officer lian pui puiten bial an fan dawnah anmahni an mikhual dawnin ar emaw khatiang thil tha tha kha buatsaih a ngai a, pawisa hi a ngai tam lutuk thin a ni. Tunah zo ar kg 1 man ringawt pawh ₹ 450/- a ni a, anmahni chauh chuan ₹ 600/- in engtinngan an kal theih ang, VIP treatment ah? Chuvangin hei pawh hi uluk taka ngaihtuah a ngai a ni. VC remuneration pawh hi tihpun a ngai, a tlem berah VC te chu thla khatah ₹ 5,000/- bawr vela tihpun ni thei se chu tha ka ti a. Tun budget-ah a nih lo pawhin budget tharah next year atan hei hi chu uluk deuha ngaihtuah ni se tha ka ti. An hlawh hi a tlem lutuk avangin anmahni pawh NREGS-a pawisa draw nan pawh kal manah leh haw manah ringawt NREGS hlawh hi an hmang zo vek thin a ni. Chuvangin mipuite hnen atangin an pawt lo thei lo a ni a,

VC-te chu an khawngaihthlak lutuk a ni, they are bound to pull something from the NREGS, a job holder an ni a, a tih loh theih loh. Chutiang zawng chu a ni a, mahse remuneration hi kan tihpun theih chuan hei hi chu a bo dawn niin a lang a ni.

Tin, ADC fund allocation chungchangah pawh niminah MLA zahawm tak Pu C.Ngunlianchunga'n a sawi a, chuvangin uluk deuhin ka sawi lo mai ang a. Mahse a bik takin CADC bik kha tlem ka sawi duh a. Question No. 30, Unstarred Question a ni a, session hmasa khan CADC-ah CEM ngeiin chhanna a lo pe tawh a, February, 2019- ah hian plan sector-ah a hlawh hi one crore seventy one lakh fifty four thousand.

Tin, March-ah hian a pung nasa khawp mai a, four crore eighty seven lakhs seventy seven thousand a ni, a pung nasa lutuk, 200/300 percent velin an tipung a. Tin, non-plan sector hnuaiah pawh February-ah pawh four crore seventy three lakhs twenty three thousand a nih laiin March-ah hian fifteen crore forty six lakhs ninety three thousand a ni a. Hei hi CEM, Chakma Council-in sessiona an channa a ni a. Pu Speaker, hei hi House property atan ka rawn submit duh a ni, uluk deuha en theih turin .

Tin, chu mai bakah tunah fund allocation hi nikum aiin kumin ah salary head leh non-salary head hi a tlahniam ve ve a ni. Chuvangin engtinngge kal dan tur, District Council bik hi illegal appointment, irrelevant appointment an pe chhuak nasa a, nakin zelah buaina a awm ka hlau a ni, Pu Speaker. Chuvangin uluk deuh ngaihtuah ni se ka duh a, standing order-ah pawh a awm a, Governor atangin illegal appointment pe lo turin thu chhuah a ni a. Kum 2016 hian Governor atangin standing order pawh a awm a, hei pawh hi House property atan ka rawn submit duh a ni Pu Speaker. Hei hi uluk deuhin illegal appointment te, job creation leh pay upgradation with salary back-date in an rawn pe a, a pawi khawp mai. Hei pawh hi District Council Department leh Finance Department atangin uluk deuhin hma la thei se, funding kal dan hi a dik loh chuan nakin zelah CADC hi khawiahmah a awm lo ang tih ka hlau a ni.

Chutiang bawkin document tam tak kan nei a, appointment pek theih loh anih laiin, appointment thar an siam a. Hei pawh hi copy tam tak ka nei a, backdate-in an pe vek a ni. Numeration-te pawh legal appointment-te,

regularization te pawh tam tak a awm a, District Council- ah hian hetiang hi tam tak a awm a ni Pu Speaker.

District thar 3 tih hlawhtlinna tur hian four fifty lakhs dah kha tha ka ti a, chumi rual chuan existing district-te pawh, sub-division-te, block te pawh hi strengthening a ngai a. Building chhe tak tak a awm laiin hetiang lamah hian fund hi allotment awm thei se Pu Speaker. Chu mai bakah ka rawn sawi tawh a, Civil District 3 mai bakah tunah hian a vaiin 11 a lo ni tawh a. Chu aia tam chu awm thei se, geographycal location pawh Mizoram-ah a buaithlak lutuk, difficult area kan nih avangin, District thar, Block, R.D. Block leh Civil Sub-division hi dah belh theih ni se, nakin zelah central lam atangin sum pawh kan dawn theih nan district development fund, sub-divisional fund, block development fund tan central nasa takin kan dawr thei a. Hotute convince thei turin assurance pawh confidence pawh ka nei a. Chuvangin Civil District, Sub-division tihpun hi tha ka ti a. Pu Speaker, hun hi ka hmang rei em ni? BJP pakhat chauh ka ni a, minutes 15 tal chu hun min pek belh thei la. Tin, SEDP chungchangah hian( SPEAKER : Hun a zo tawh e) han chhiar hian engmah hlawkna a awm lo Pu Speaker, minute khat lek aw. 75 hundred lakhs a nih laiin kan minus zel chuan a last-ah engzahnge awm ang ? 66.45 lakhs chauh a ni dawn a, SEDP chhungkaw tinah nuai 3 sem tur chuan hei chauh hi a awm dawn a Pu Speaker, chuvangin engtingnge kan kal dan tur hi ka hre lova. Project base angin an kal dawn tih pawh hi mak ka ti khawp mai. Chu chu policy base ni lo in, project base angin an kal dawn chuan sum hi khawi atangin nge a awm ang le? Chuvangin Pu Speaker, he budget hi pass mark ka pe thei lova, grace mark-in pass mark kan pe thei a ni, grace mark pawh hi MLA LAD fund nuai 50-a tihpun vang a ni e. Pu Speaker, ka lawm e.

**S P E A K E R :** Member zahawm tak Pu Lawmawma Tochwawng i lo sawm ang.

**Pu LAWMAWMA TOCHHAWNG :** Pu Speaker, ka lawm e. Kei hi he budget sawi-ah hian 21-na ka ni em aw ka ti a, a zat ve kan zo deuh chiahin ka hria a. Kan ngaihthlak takah khan budget chungchanga lawmthu sawina kan ngaihthla tel deuh vek a. Thahnemngaih avanga khawi lai lai emaw

han chul mam duhna te a awm a. A pum puiah erawh chuan lawmthu sawina kan nei deuh vekin ka hria .

A tlangpuia han lakin kei chuan a chhung figure neuh neuh kha a tlem thei ang ber sawi ka tum ang a. Nimina kan Deputy Speaker zahawm tak sawi ang khan a tam thei ang ber Mizotawnga sawi ka tum bawk ang a.

Kan budget tur, kan budget ni mek, kan ram budget hi Mizopa loneitu sawi dan chuan sawi dawn ila, a tawngkam tur nia ka rin chu kan lo pawm, kan thlawhhma tur chu a phurawm hle mai a, hawpkhawp kan thar ngei dawn e, sadai ek in a khat alawm le, an tih ka ring a. Leitha hmun, thil tam tak tharchhuah theihna tur a nih ngei a beiseiawmin ka hria a, a bul atanga a lan dan hian. A bul kan han tanna pawh kha a lawmawm na rawh e, a fuh viauin ka hria a. Opposition lamte nen pawh khan kan inlungrualin ka hria a, lawmthu sawina ri kan han hre nak nakte pawh kha a lawmawm khawpin ka hria . Pastor Chhawna'n "Hruikhat vuan ula, ral lehlam hmasawnaah sawn ka then kai ang che u" a tihte pawh kha kan hnaih kuar kuarin ka hre deuh a. He kan ram hian hma kan sawn dawn tih loh theih a ni lo a ni.

Tin, ka lawm zualna em em chu, nimin lama kan hun tawng he budget kan sawina chungchangah khan a ni a, nitin zantin ka lawmna a zual zel tih ang deuh khan sorkar leiba tehna atanga kan ram pawisa tlahniam zel tur, tun tumah pawh a la tlahniam leh zel tur chungchanga MLA zahawm tak Thorang bialtu Pu Mama'n lawmthu a sawi kha ka rilru a khawih khawp mai a, a dangdaiin ka hria a. A chhan chu bat tam hi changkanna a ni tih policy kha kan kalsan dawn ta mek niin ka hria a, thil lawmawm tak niin ka hria. Bat tam ringawt aia thawhchhuah tam hi changkanna a ni tih hi kan ram hian kan hre deuh deuh dawn niin a lang a, chu lam kawngah chuan a harh pawh kan harh chhuak dawn niin ka hria.

Pu Speaker, kan Chief Minister leh kan Finance Minister zahawm takin, 2019-2020 budget puitling min pharh sak hi a lawmawm tak meuh tih hi a bul a tanna atang hian a lang a, chu chu budget speech Mizo tawnga chhiar tur kan nei te, Sap tawnga chhiar tur kan nei te nichina kan ngaihthlak tak ang khan mimawl ber tan pawh, zir chiang peih tan chuan hriatthiam mai theih a ni a.

Figure diklo awm zeuh zeuh dik zawk han tarlan leh thai lan a ni te hi, enge maw zawng chuan a original hlei hleiin ka hria. Diklo pharh chhuah ai chuan a dik kan han inhlui te hi a lawmawm ka ti. Hetianga a dik zawk inpekthe hi thil tha tak a ni.

Finance Minister zahawm tak, Chief Minister ni bawkin budget tam tham tak mai vaibelchhe 10,692.30 source hrang hrang atanga hai khawma resource mapping fel tak mai, a hmanna tur hlawk tak, daihzai leh huapzoa ruahmanna a siam hi lawmawm ka ti a. Keini vawikhatna atan pawh a awm ang hi chu kan hre ve ruau ruau thei a ni.

Mizoram hi kan hriat theuh angin state tam tak ang bawka intodelh rih lo, mahni kutkea ding thei lo kan la ni a. Duh thala sum hman tur kan nei lo chung chung pawha kan neih chhun ang ang te daihzai tak leh tangkai taka hman a nih theihna turin ruahmanna fel fai min siam sak hi a va chhuanawm em tih loh rual a ni lo va, ram mipuite pawh an lawm ka ring a ni. Ka han tarlan hmasak duh chu kan zavaia kan chanvo tur lo lang hi a ni a. Kan budget-ah hian Mizoram mipui ten kan hnemhnanpui tur eng emaw zat a inphum tun mai a, a vai chuan kan sawi seng dawn lo va. Chung zinga langsar chu MLA Fund ₹ 100,00,000 atanga ₹ 150,00,000-a, thlei bikna awm miah lo, Pu Speaker, i dinglam ami, i veilam ami tih tur awm lo va kan zavaia kan han hmang tlang thei tur hi thil lawmawm tak a ni a. Hei hi chu ram pum pui nghawng, a kil ber pawh dai thleng tur a nih avangin kan zavai hian lawmthu sawi tur kan nei theuhin ka ring. MLA Fund punna tur hi budget-ah a tak ngeia dah a ni tih pawh hi 'Demand for Grant' bu atang hian kan hmuh theih kha.

MNF party-in Mizoram mipuite hamthatna zawk tur atan hun tha, ni tha an neih theihna tur atana kan campaign au hla kha district thar 3 a ni a, kan hria a. Hmuh theih leh hriat theihin tunah a ding a, a pen tan ta chhut chhut a ni a, lawmawm tak a ni.

Zirtirtu indaihlohna leh zirna chungchanga hma lak kan tumna zawng zawng chipchiar takin an sawi tawh a, kan sawi chipchiar ve tawh lovang. Tin, thalaite tana khawvel thar lo awm tur atana sport policy neia mumal taka kan thalaite an han infiam turte pawh hi a va lawmawm em ! A phurawm leh zualin ka hria a. Hetianga eizawna puitling leh tluantling kan neih theihna tura budget-a sum dah hlawm lian pui pui a han ni ta te hi a thlamuanthlak a ni.

Tin, SEDP kan flagship programme ber atana 750 crore earmarked a han ni nghal pawh hi hun kal tawhte en chuan tih tak takna hmel a lo lang a, thil lawmawm a tling a. Bul tan nan chuan hei hi a tlem lo a ni. A la kal zel dawn a ni tih hi lo hre tlang ila a thain ka ring.

Kan Finance Minister leh Chief Minister ni bawk zahawm takin budget a han pharh tak hi huapzo budget, socio economic development lama kawng dik, chak taka min hruaitu tur, growth oriented budget a ni chiang hle a ni.

Tin, a lawmawm leh zual ka han tihna chu Lok Ayukta chungchanga kan Finance Minister-in thliar bik nei lo, diknaa rorelna a nih theih nan a let thum lawih maia Lok Ayukta thuam thatna tur tangka a han dah hi thil lawmawm kan hriatreng atan a tha awm mang e aw! Thil dangdai tak a ni tlat a ni. Hei hian a entir chu he sorkar thar te reuh hian eiruk a tum lo a ni tih a tilang chiang tak zetin ka hria. Mi diklo leh fellote an lo awma veng tlat tur, a tul a nih chuan dan leh hrai hmanga chung mite chu a tul a nih chuan a hrem pawh hrem tur. Lok Ayukta tihchangtlunna turte hi thil lawmawm a va han ni em aw ka ti a.

Pu Speaker, kan budget pharh mekah hian thil lawmawm tak dang lo lang leh chu kan hmuh theuh angin sum tam tak hman tura ruahmana ni a. Chuti chung pawh chuan a hmanralna tur a tam tehlul nen hian Fiscal Responsibilities & Budget Management Act, 2006 in tehna a siam anga fiscal deficit leh kan leiba GSDP atanga teha dinhmun hlauhawm loah min la din tir thei hi budget siamtu hi a ngaihtuahna zawng zawng a hmang a, a puitu department lam pawh hian an pui tha a ni ang tih hi a rinawm a ni. Chu bakah revenue surplus ₹ 1143.47 crore neia fiscal deficit GSDP atanga teha 2.06% chauh nei thei tura ruahmanna awmte hi a ngaihthatthlak thlawtin ka hria.

Tin, he budget hian nichina ka han sawi tak lawk kha ministry hmasain NEDP, SEDP a lo kalpui tawh, NEDP an lo tih tawh thin avang khan a hming hi kan han dah lo thei lo a ni ang a. Chung project eng emaw zat chhunzawmna tur atana ₹ 11,000 lakh a la ruahman theih cheu mai hi a va rilru zau thlak em aw! Hei hi thil chhinchhiah tlak tak a ni Pu Speaker. Budget tha, budget rilru zau tak a ni kan ti thei ang a. Sorkar hmasa hmalakna an chhunzawm duh lo alawm maw le tih chu thaichhiatin he budget kan hman atang chuan a awm tan dawn niin a hriat theih a ni.

Pu Speaker, House member zahawm tak takte ka han ngen duh chu, he budget hi kan han hmang dawn a, lawmthu kan han sawi liam liam a. Ruling MLA kan ni emaw, opposition kan ni emaw, nichina kan ngaihthlak tak ang khan a hlawhtlinna leh a hlawhchhamna hi keini mipuite thlanchhuah, a hma hruaitu, he sum hman that leh that loh kawngah pawh mawhphurtute kan ni vek mai a. Chumi piahah chuan ram mipuite hemi kawnga min tanpuitu turte, ka ram tan enge ka tih theih ang tih ngaihtuah chung a min venpui chung a tha taka hmangho turin kan insawmin kan inngen a. Kan tanruala kan thawhho that phawt chuan tunlaia kan sawi lar tak pakhat sustainable development goals, SDG's hi kan ram hian min thlenpui ngeiin ka ring a ni.

Tin, kan lawmna hi a tak takah chuan kan kal chho ang a, nichina kan sawi tak ang khan nakum March thlaah emaw, February thlaah emaw chuan kan lawmna hi a kim theiin a rinawm e. Ka lawm e.

**S P E A K E R** : Tunge sawi leh ang le? Member zahawm tak Pu Nihar Kanti Chakma i lo sawm ang.

**Pu NIHAR KANTI CHAKMA** : Pu Speaker, ka lawm e.

Tam tak pawh sawi tur ka nei lemlo a. Amaherawhchu, tawite sawi ka duh chu budget 2019-2020 hi Chief Minister zahawm takin ni 13-a a present a ni a. Vawi tam tak ka chhiar a, a lawmawm ka ti khawp mai. Awlsam deuhin English leh Mizo tawngin chipchiar takin an ziak a. A hriat te pawh a awlsam khawp mai a. Chuvangin, mimal takin hetiang budget tha tak official ten an buatsaih thei hi a lawmawm ka ti khawp mai a. An chungah te pawh lawmthu ka sawi hmasa a ni.

Pu Speaker, budget-ah kan hre vek a, pawisa hman zat tur, pawisa expenditure tur, pawisa hmuh zat tur hi chiang deuhin an ziak a ni. Entirnan 14<sup>th</sup> Finance Commission rawtna angin kumtin pawisa dawn turte pawh a ziak chiang a ni.

Pu Speaker, hmannah 2019-2020 budget pum puia sum ruahman chu cheng vaibelchhe 10692.30 a ni tih kha an sawi tawh a. A taka revenue expenditure hnuiaia an dah chu cheng vaibelchhe 8,400.52 a ni a. Hei hi kan hre vek a ni, kan salary expenditure leh sorkar hnathawkte hlawn, a bikin pension te senso na a ni a. A takah pawisa hman tur chu ₹ 2,288.78 a ni a. A takah hei hi hman tur a ni a. Mahse,



budget-ah tam tak hi lawmthu te pawh sawi tur nei ve a ni. Chu chu ka thiante member zahawm tak takte pawhin an sawi nual tawh a. District 3-te pawh a lawmawm a, cheng nuai 450 an dah a.

Social Economic Development Programme sorkar-ah tun term-ah budget pharh hmasak ber a ni a. Sorkar tharah flagship programme-ah nuai 7,500 chiah an dah hi kei chu a pawi ka ti. A tlem em em a, entirnan budget-a lang chu ₹ 2,288.78 a nih kha. Mahse, an flagship programme an sawi danah chuan mipui hnenah a thleng tur a ni a. Hetiang zat chiah an dah hi tlem ka ti khawp mai a. Amaherawhchu, hei hi token ang pawhin an dah chu a lawmawm ve tho a ni.

Elementary level-ah pawisa dah hi a tha ka ti khawp mai a. Kan bialah te pawh zirtirtu nei lo school te hi tam tak an awm a. Chuvangin a lawmawm a ni. An dah hlawm tur chu tam tak a awm tho na-in Pu Speaker, ka lawm loh zawng hi tawitea in tarlan ka duh chu khawvelah hian kan mamawh ber chu ei leh bar a ni a. Eitur a awm loh chuan eng kawng zawng pawhin awm ta ila a nuam dawn chuang lo a. Mahse, budget-ah khawi hmunah pawh Agriculture a lang lo hi pawi ka ti khawp mai a. Economic survey ka hmuh dan chuan Mizoram hi ei leh bar ah hian a la intodelh lo nasa em em a. Economic survey-a a lan danah chuan Mizoram-in kan mamawh buhfai 1,80,000 metric ton a ni a. Keini tharchhuah theih chu 59.606 metric ton kumtin a ni a. Chuvangin a deficit nasa khawp mai a, a percentage ang zawngin han chhut ta ila, 66.88% hmun dang atangin lakluh a ngai a ni a. A pawi ka ti khawp mai a, entirnan ka bialah sawi ta ila, potential area a ni a. Mizoram pum pui kan intodelh theihloh pawn Tlabung sub-division bik erawh chu hmalak chuan kan intodelh thei ang ka tihna a nih hi. Chuvangin, hemi sector-ah budget-a a lang lo hi kei chu a pawi ka ti khawp mai .

Chubakah thil dang an mamawh, eitur a awm loh chuan kan duh miah lo ang. Chuvangin, hemi sector hi sorkar hian priority min pe thei se kan duh khawp mai. Thil dang erawh chu entirnan electric-te pawh kan mamawh nasa lutuk, tunlai khawvelah electric a awm loh chuan engmah thil a tih theih loh. Hemi chungchang budget-ah a lang lo hi a pawi ka ti khawp mai, Pu Speaker.

Chu bakah Excise & Narcotics budget-ah a lang lo hi a pawi ka ti khawp mai a. Kan hria a, tun sorkar pian veleh zu te an khap a, a lawmawm a. Kan hrethiam a ni, zu in khap. Mahse, hemi implement-na tur work force, entirnan Narcotics &

Excise hi strengthen ngai a ni a, department dangah pawisa hi kan pek theih chuan, engvangin nge Excise & Narcotic Department-ah hian pawisa kan dah miah loh? Enge a awmzia? Engtin nge hemi hi a hlawhtlin ang? Hlawhtlin ngaihna a awm lo. Tawngkam ringawtin an an sawi a, a takah action lak a nih si loh chuan kan umpha thei lo ang.

Pu Speaker, thufingah “Action is louder than speak ” a ti a. Tun sorkara ka hlauh ber chu (SPEAKER: *Chair kan inthlak lawk ang e aw..*) DEPUTY SPEAKER at the chair (*Deputy Speaker : Awle chhonzawm ang le*) hmun hrang hrangah nuai 3 kan sem ang a, project kan siam ang a’ tih sawi thin a ni a, a takah a lan loh chuan a pawidawn a ni. Chuvangin, ka ngaihndan chuan, Pu Deputy Speaker, action-in, a sawi ang khan ti ngei se tih ka duh a.

Hmanniah Chief Minister zahawm takin press conference-a kan hmuh hi hetiang zawnga ngaihtuah chuan dikna lai chu a awm ve mahna, tun budget erawh hi chu a chhe thung a ni. Tihian a sawi a, ‘project siam thiam chuan central atangin sum tam tak a hailuh theih a ni’ a ti a. Department a thei theiin central atangin Mizoram hmasawna tur pawisa tam tak haichhuah a ngai tihna a ni.

A tawp berah chuan budget tlangkawmnaa a sawi hi kan hre vek a, revenue tlem chauh kan nei a, an tum dan erawh chu... (*Deputy Speaker: Minute 1 i la nei e*) he budget atang hian mipui tan phurrit a ni dawn em tihte ngaihtuah theih a ni. Engpawhnise, Pu Deputy Speaker, member dangte pawhin an sawi nual tawh a, a tlangpuuin a tha e, he budget hi. Ka lawm e.

**DEPUTY SPEAKER** : I hun i hmang thiam hle mai. Tunge kan sawm leh ang le? Pu Lalrindika Ralte i lo sawm ang u.

**PU LALRINDIKA RALTE** : Pu Deputy Speaker, ka lawm e. Ka hmaa thusawi kha a sawi tha khawpin ka hria a, ka thlawp khawp mai tih ka han sawi hmasa duh a. Pu Deputy Speaker, nimin lamah khan zawhna leh chhanna hun kha kan hmang a. Khatah khan rin loh lampang kha a rawn risk a. Kan bial chhung DHO Office sawn chungchang te kha zawhna leh chhannaah te khan an han tilang a, min surprise angreng viau a. Amaherawhchu zawhna leh chhanna mai a ni a. Kan House Leader te leh a changtu Minister te pawh ka ngen duh chu, sorkar hnathawk pakhat sawn pawh hi, a bial te, an khua ten an ui thin a, kan hria a. Chutiang a nih

laia office pum pui mai han inlaksak tumna rilru awm kha chu, kha kha chu a kaltlang ka rin vang lam ni lovin, kha kha chu khulai bialah khuan in mihringpui te kan awm ve tho a ni tih kha min hriat sak ve ula. Engpawh ni se, kan rilru te pawh a na ve thei a ni tih te min hriat sak ula thain ka hria a. In bial in hmangaih ang khan kan bial kan hmangaih ve a ni tih te pawh min hriat sak ula thain ka hria. Chuvang chuan midang ta thlu kher loa thil tih theih dan hi sorkar hian a hriat pawh ka ring a, khatiang kha chu min ngaihtuah sak lo turin ka ngen hmasa duh a ni.

Tin, Pu Deputy Speaker, kan budget hi sum hrim hrim hi a tam hi a tha a, kan duh a, hmasawna atan pawh kan mamawh a. Amaherawhchu, kan rilruah awm se ka duh chu management lam hi a pawimawhin ka hria a. Khawvel hmun tam tak kan hria a, financial institution ngei pawh hi a tluchhe thei a ni tih hi kan hriat a thain ka hria a. Tin, chhungkua mi hausa tak tak te pawh hi an tluchhe thei a ni tih hi kan hre vek a. Chuvang chuan heng sum kan tih zawng zawng hi a pawimawh, hmasawn nan kan duh, a tul em em, kan mamawh ber a ni. Chutihruah erawh chuan management lampang a fel loh chuan khawvelah hian sum ngah ngah an dingchang bik kher lo tih kan hriat a thain ka hria.

Vawiinah hian a pawimawh berah chuan mi puitling tak tak ram hruaitute kan ni hlawm a. A hminga sorkarna lam chelhtu te pawh mi puitling tak tak, mi rinawm tak tak an ni a, ka ring tawh hle a. Tin, nangmahniah a inngat thui hle niin hriatna ka nei a, keini pawhin tih tur chu nei tho mah ila. Chuvang chuan vawiinah hian rilru tak tak leh thinlung tak taka heng kan budget-te hmang tangkai tura in ngaihtuahna in sen pawh a thain ka hria a, kan inngen duh bawh a ni.

Tin, Pu Deputy Speaker, ka lawmna pakhat chu kawng chhawng leh mau chungchang hi a hmasaah hi chuan a lang Chiang Lova, next year lamah a lang ang nge chu ka hre Chiang Chiah Lova, ka zirchiang hman lutuk lova, a lawmawmin ka hria a. A chhan chu hei hi kan ram leh kan hnam tan hna hmasaah nei ila, sum tam tak involve-na tur a nih avangin hemi a langlo a hi thinlung takin ka lawm a ni.

Chuvang chuan mau chungchang bik hi ka han sawi tel hram duh chu a hma kum 10 liam ta lamah khan sorkar hmasa te pawh khan a lo buaipui tawh a. Vawiinah hian kan state tan revenue a nihawm hi ka hre lova. Chhungkaw pakhat pawh mau avanga hlawhtling pawh an awm chiah pawh ka hre lova.

Chuvang chuan mau chungchang bik te a lang lo hi chu chu ka lawmna chhan a ni. A engemaw lampanga va sawisel ni lovin thinlung taka ka lawmna chu a ni a.

Tin, sum hi lakluhna lampang kan nei lo hle tih kan sawi thin a. Chumi avang chuan ka ngaih pawimawh ka rilrua awm reng thin chu Mizo te hi chuan kan economy ti tha turin kan ram tana kan thawhna tur atan hian sum renchem hi a pawimawhin ka hria a. Kan sum hmanna te pawh hi department hrang hrangte pawh hian kan enzui thar hi thain ka hria a. Tuki zing zawhna kan neihah khan P&E Department-ah khan hengah te pawh hian ka rilruah eng ang sum nge aw kal tih hriatchian ka duh avanga zawt ka ni a. Rinai takin a tam lova, an sawi tawh a. Helam kawng hi sum save-na hi kan ngaihtuah a thain ka hria a. A bik takin ei leh barah kan intodelh lova, buhfai kan lei thin a, kan hria a. Buhfai lei nana kan sum hmante hi rin aiin a tam a ni tih hi mipui nawlpuiin kan hre lova. Tin, subsidise a ni tih te pawh hi hriatchian a thain ka hria a. Tin, buhfai lam kan sawi laia ka rilrua awm chu kal man chungchang, buhfai kan han phurh kual velna hi a to uchuak em em a ni tih hi kan hriat tlan a thain ka hria a. Mamawh kan chawkluhna ber chu phailam atangin a ni a. Guwahati atanga Aizawl kan thil phurh man hi quintal zawngin sawi ta ila, quintal khatah ₹ 255 te, ₹ 265 te a che ve a, a market a zirin. Amaherawhchu, a sang lutuk ngai lo, ₹ 300 hi a thleng ngailo hrim hrim a, ka hriatah chuan. Chutiang chu a ni a. A thui zawng hi km 494 vel a ni a, a kawng hla lamah pawh ni se, tuna National Highway No. 6 atang pawh hian ni se a rate hi a inang thawkhat a ni, chu chu Guwahati atanga a phurh man tlangpui a ni. Mizoram chhungah hian Saiha atanga Lungpher hlat zawng hi Km 35 a ni a, engnge a kalna kawng chu chiang takin ka hre lova. Buhfai quital 1 phurh man hi ₹ 235 a ni. Chuvangin buhfai kan phurh kualna vel pawh hi ennawn a tha viauin ka hria Pu Deputy Speaker. Hei hi a hlawk bera chu a carrying contractor kha a ni mai. Chuvang chuan ram leh hnam hian a chhawr tak takna awmin ka hre lova. A dang dang pawh a awm a. Tin, Zuangtui atanga Saiha hi 324 kms a ni a, a phurh man hi ₹ 486 a ni. Kan ram chhungah, kan state chhungah khutah Guwahati km 500 dawn ami kan phurh man aia to tak maia kan han phurh kual vel hi, sorkar sum hi a uiawmin ka hria a, a remchem zawngin ngaihtuahna kan neih pawh a thain ka hria a ni.

Tin, ka han sawi belh duh zawk chu, siam chhuah kan nei lova, agriculture pawh ni se tharchhuah tak tak kan nei lo tih kan hria a. Chutah chuan pawimawh em ema ka hriat chu, engtinngge thil hi tlawm zawkin kan lei theih ang tih hi kan ngaihtuahnaah awm se thain ka hria. Thar chhuah kan nei lova, lakluh vek a ni; engtinngge tlawm zawkin thil kan neih theih ang tih hi a ni. Chutiang atan chuan railway-te hi a pawimawh em emin ka hria a, inkalpawhna a ni mai a, hengah hi chuan. Chuvang chuan rail-te hian Sairang hi lo thleng tawh se tih hi ka nghakhlel em em a. Rail hian Sairang lo thleng ta se, entirman, buhfai kan lei thin hi a tlawm dawn a; cement a ni emaw, rod a ni emaw, heng zawng zawng hi a tlawm vek dawn. Chu chuan kan economy tan, sum save kha kan nei dawn a ni tih kha kan hre tlang a. Chuvangin railway chungchangte pawh hi kan ngaihpawimawh zual thain ka hria a.

Pu Deputy Speaker, ka sawi tum ka la sawi mang lo a, waviin chu a va mak ve ! Engpawhnise, ka han sawi belh duh chu, hei SEDP kan sawi a, ₹ 75,000 lakh kha dah a ni a, a hmanna tur hrang hrang point 9 a rawn sawi a. Khami sum belhkhawm kha ₹ 68,355 lakh a ni a, a hmanna tur a rawn sawi tel loh hi ₹ 6,645 lakh a ni. A zawng zawng chu a ziahlan theih loh a, kan hria a, chutihlai chuan ₹ 6,645 lakh lai mai pawisa bang la awm si ziah lan tel loh hi han sawifiah pawh a thain ka hria. Engpawhnise, capital expenditure chungchangah hian Pu Deputy Speaker, ka han sawi duh leh lawk chu vaibelchhe 254.9-in nikum kan pha lova, tichuan, a chhan leh vang hi a rawn ziaak a, District thar hawn vang leh sorkar hnathawk hlawh pun vang tih hi a rawn sawi a. Sorkar hnathawk hlawh pung avang leh District thar hawn tur atan chuan he budget hi a that viau lai hian mipui dang zawng tan hian nikum budget capital expenditure ah hian kan pha lo hle a ni tih a Chiang a. Chuvang chuan hei pawh hi kan ngaihtuah nawn a thain ka hria.

Tichuan, PAHOSS te pawh hi Pu Deputy Speaker, a thlawn ngawt maia pawisa pek tuma lang lai hi kan ramin chhawr dawn pawh ni ta ila mimal hian an chhawr zawk dawn hian ka hria a. Parking an siam ang a, parking atangin pawisa an la lut dawn bawk si a. Chuvang chuan soft loan ang tal pawhin hei hi chu a tih chi lawm ni tiin ngaihdan kan sawi duh a

Tichuan, a tawp berah chuan Pu Deputy Speaker, GSDP punna chungchang hi kan sawi a. A chhan bulpui ber chu sorkar hnathawk vang a

ni tih hi Chiangtakin a lang a ni. Hemi point chiah hi tichuan kan zo ang. Kan ram leh hnam, kan state tan chuan duhthusamah chuan Agriculture sector emaw, Industrial sector atangin emaw ni se chu a lawmawm ang a. Chuvang chuan kan GSDP than dan pawh hi mipui nawlpui, mi rethei tan hian a thatna a awm chuangloin ka hria a, chungte chu ka han sawi tel duh a ni. Engpawh ni se Pu Deputy Speaker, hun min pek belh a ka lawm e.

**DEPUTY SPEAKER** : Aw le, minute 9 hun a la awm a, minute 9-a sawi zo thei tur kan awm em aw ? Aw le, Pu Ramthanmawia i lo sawm ang u.

**PU RAMTHANMAWIA** : Pu Deputy Speaker, ka lawm e. Member zahawm tak tak ten ninin lam atangin chipchiar takin kan budget 2019-2020 chungchang an rawn sawi tawh hlawm a. Sawibelh tur pawh awm tawh lo khawpin kan sawi kim viau a. Amaherawhchu member thenkhat ten kan budget hi nikum kan pha lo tih te, ava tam lo ve tih te an han sawi a, ka rilrua lo lang chu Kan Chief Minister leh Finance Minister zahawm takin a sawi, ‘ a chi tur a ni ’ a tih lai kha a ni a. A chi tur atan chuan a thahnem viau alawm maw le ka ti a ni.

Budget-ah hian chhiah thar lakna tur, mipui phurrit tur siam ka hmu lova, hei hi lawmawm ka ti a. Member zahawm tak tak te khan hlauhthawna an neih thu an sawi a, amaherawhchu helaiah hi chuan a lang lo a, hei hi thil lawmawm tak niin ka hria a. Tin, kan sawi fo sorkar flagship programme SEDP atan cheng nuai 75,000 dah a ni hi a lawmawm ka ti. A chhan chu sorkar kan han in form a, a 6-naah, budget hmasa berah dah theih a ni ringawt te hi lawmawm ka ti a.

Sorkar hmasa kha kan thlir kir chuan kan sorkar tukah cheng nuai khat kan sem ang an tia maw ni ka hrelo a. Amaherawhchu an sem theih hun kha chu kum 2 hnu, kum 3 dawn lai a niin ka hria a, chu chu thil harsa tak a ni tih a hriat a ni. Sawi ang hian thil a awm mai lo a ni, kan insawi ang leh kan intiam ang hian thil hi a awm mai lo a ni, kan ti mai thei lo a ni tih budget siam atang hian a lo lang tawh thin a. Vawiinah erawh chuan Kan Finance Minister leh Kan House Leader zahawm takin a intiam angin SEDP atan, sorkar flagship programme atan nuai 75,000 budget pui hmasa berah pharha sawiho theih a ni hi a thutiamah a ding a, hei hian a hmalak tumna, mipuia kan lo inzawrhna a nemnghetin ka hria a, lawmawm ka ti.

Tin, sorkar tirh atanga kan hotupa ber in a buaipui leh MNF sorkar hmasa pawhin a buaipui em em chu kawng hi a ni. Kum tam tak kawng a that loh avangin harsatna kan tawh nasa em em a, ram pumah kan sawi a ni, a chhan leh a vang chu engpawh ni se. Amaherawhchu sorkar tuk atangin kawng siamthat hna thawh a ni nghal a, hun reilote chhungin kawng tha kan hmu nghal hi a lawmawm ka ti a. Chu mai chu la duhtawh lovin SEDP huang chhungah chung kawng cheibawl leh siamthat zelna atan chuan cheng nuai 15,000 a la dah cheu bawh a. Tin, chu mai ni lovin road fund board hman atan cheng nuai 5,000 a dah leh hi a lawmawm hle mai a, hei hian kawng chhia a ngaih pawimawh zia he sorkar thar hian a tilang chiangin ka hria a. Kan House leader hian mipui te hi kawng chhia ah min tlan tir reng a tum lo a ni tih a sawi theihin ka hria a, chu chu thil lawmawm tak a ni.

A nihna takah chuan thil tam tak intawm kan nei a, kan intawm zinga mipuiin kan ngaih pawimawh ber nia ka hriat chu kawng hi a ni. Bial hrang hrang kan kal a, kan bial East Tuipui te pawh khian an sawi thin a, ‘ sorkar hian kawng tha min pe ula, a bak hi chu kan intodelh ve ang,’ an ti hial a ni. Chuvang chuan kawng tha hi mipui hian neih an phu a, kan pek pawh hi a ngai a. Chutianga tura kan House Leader, Finance Minister ni bawkin a ngai pawimawha, hetiang a sum tam tak a rawn dah hi a lawmawm hlein ka hria a, chu chu lawmthu ka han sawi bawh a.

Tin, mipuite mi hrisello kan ni a, hnathawkmite kan ni a, thingtlang lamah phei chuan hnathawkmite chu hrisel lo tak tak kan nih avangin sorkar hnathawk angin damdawi man te, damdawi ina awm man te pawh kan harsat em em a ni. Bial atangin an lo chhukthla a, lo chhukthlakna pawh puk chawpin an lo thleng a, inenkawlna chu sawi loh. Chutianga harsa tak tak te chu zokhaw lama kan mipuite an ni a ni. Chu mite mamawhna hriain Mizoram Health Care Scheme MNF sorkar hmasa in a lo duan tawh, kha pawh kha tha hlein ka hria a, chu aia tha zawk tura a han buatsaih hi a lawmawm ka ti a, chung atana nuai 2,000 a’n dah te; tin, Health Care corpus fund atan cheng nuai 5,000 a dah te hian zaa sawmsarih sorkar hnathawk ve lote tan a van tha em, a va lawmawm em ka ti a ni.

Kan sorkar hmasa, MNF sorkar hmasa khan ka hriat reng chu Durtlang damdawi inah ka han kal a, corridor-ah khan an mu khat tlat mai a, nurse te kha ka zawt a ni. ‘Engatinge heti em ema damlo hi an tam mai le,’ ka ti a. ‘A ! Health Care Scheme a awm a, PMGSY kawng hi sorkarin an lai vek tawh si a, PMGSY kawng a

lo tlang chuan sumo an nei deuh fur a, damdawi inah sumo an rawn thleng zung zung mai a, chuvang chuan tunhmaa rawn thleng pha lo te an rawn thleng pha a, Health Care Scheme hi a tha bawk si a. Tihianin kan han enkawl a, an dam a, puanthuah an tel a, kutzungpui hi an nem a, an haw daih,' an ti a ni. An lawm tak tak a nih chu, a bill buaipui a ngai lova, a bill theih zat, chuti zat, khati zat han tih ang chi kha a awm lo a ni. Chu aia tha chu tunah hian kan hotuten an ruahman leh niin ka hria a, hei hi a lawmawm ka ti khawp mai. Zirna chungchangah – ( DEPUTY SPEAKER : Kan hun hi a tawp tlat mai a, khi dar khat a ri a). Pu Deputy Speaker, ka sawi rei tawh lovang. He sorkar thar hian zirna a ngaipawimawh hle tih kan sawi thin a, a takin budget-ah hian a lo lang ta hi lawmawm ka ti a. Elementary education bikah chuan kan bialah te pawh a ni a, zirtirtu indaihlohna a nasa em em a, bial dangte pawh a ni a, Zoram pumah a ni a. Chumi indaihlohna phuhruk tur chuan cheng nuai 3,000/- dah a ni te hi he sorkar hian zirna a ngaihpaawimawh zia a tilang chiang hle a, lawmawm ka ti hle a ni. Education Minister ka bialah hmannah ka han tawiam a. East Tuipui bial khi tun matric exam-ah khan Champhai District MLA bial 5 ah khian a pass percentage-in kan hniam ber, 52% kan ni. Chu chu ka'n ngaihtuah thin a, 'engvang nge ni ang le' ka ti a. Zirtirtu indaihloh vang te, hun rei tawh tak atanga School building te nen. Chutiang zawng zawng belhkhawm chuan kan hmasawn vena tur leh mi kan elna tur hi kan phak loh phah a ni tih ka hria a, Minister zahawm tak hnenah pawh ka hrilh a.

Mak ka tih em em chu nikum lama budget-a an lo dah, kumin khan bial hrang hranga MLA zahawm tak takte bialah chuan School Education atangin vung thar chhuahna tur hi a awm diah diah a ni. Mahse East Tuipui-ah chuan pakhatmah a awm lo a ni. Chutiang chuan Education Department atang hian East Tuipui khi ngaihthahin a lo awm rei tawh hle a ni tih a chiang hlein ka hria a, chu chu matric result-ah hian a lo lang niin ka hria a ni. Hei hi vawiinah hian ka sawi chhuak duh a ni, Pu Deputy Speaker. Engpawhnise, district 3 chanvo tur te, Sports atana pawisa an dah te leh kan sawi thin, ka hmaa member zahawm takin a sawi, Lok Ayukta enkawl nana cheng nuai 371.06 hi a lawmawm ka ti. He sorkar hian mipuite duhdan ang ngeiin, min thlan chhan ang ngeiin eirukna hi a do dawn a ni tih hei hian a tilang chiang hle mai a, a lawmawm ka ti a.



Tin, he budget hi duhthusamin, kan duh ang thalin sum hi a tam lo a ni maithei e, amaherawhchu eirukna a awm loha, renchem taka kan hmana, dik taka kan hman chuan hemi atang hian bul kan tan tha ang a, kan ram retheihna atang hian he budget bul tanna, a chi atana dah atang hian hmasawna kan nei thei ang tih ka ring tlat a. Chuvang chuan member zahawm tak tak ten an sawi tawh ang khan he budget hi a bul tan nan, a chi atan chuan a tha viau a ni, a lawmawm a ni tiin ka rawn sawi ve a ni. Ka lawm e.

**DEPUTY SPEAKER** : A lawmawm e, kan khatliam bawk a. Engpawhnise, kan hriat ang khan session zawh hian GPC thut tur a ni tih kha member ten hretlang ila a tha awm e.

Tunah chuan kan rorel kan chawl rih ang a, chawhnu dar 2:00- ah kan tan leh dawn nia.

Recess till 2:00 PM

### **2:00 PM**

**DEPUTY SPEAKER** : Kan tan leh tawh ang a, chumi hmaa ka sawi duh chu, nimin piah lawka kan session-ah khan MLA zahawm tak Pu Lalduhoma khan official-a department lama zawhna a zawh te a hun taka chhan a ni lo te leh chhanna hmuh mumal loh te kha a sawi a. Vawiinah kan hriata ka sawi duh chu GAD hian 9<sup>th</sup> July, 2015 khan Office Memorandum a chhuah tawh a. Chutah chuan MLA te, Ex-MLA te, MP ten department-a zawhna kan neih reng reng te ziakin fel fai takin ni 15 chhungin a chhang tur a ni tih hi thuchhuah an lo nei tawh a ni. Chumi piah lamah heng an lehkha thehluh te pawh register fel takin an vawng ang a, a kalphung chiang takin an chhinchhiah tur a ni a ti a. Chutah chuan member zahawm tak tak ten department lamah zawhna kan nei a nih chuan hei hi kan hriat reng a tha a ni. He House zahawm tak kaltlang hian he Office Memorandum hi department zawng zawng ten lo hre leh turin kan han inchah a ni e.

A dawt lehah chuan member zahawm tak tak ten Mizo tawnga kan neih ang hi chu hmang hram hram ila. A kar laka saptawng kan belh nasat lutuk hian thingtlang lama lehkha thiamlo te kan hmuhsit vang ni lovin, anni

tan a ngaihnaawm turin angin a ngaihnaawm lova. Tin, kan tawng kha hnam dang tawnga kan va thlak khan kan tawng zahawmna kan ti tlahniam ve zel a ni a. Chuvang chuan a theih chin chinah Mizo tawngin i sawi hram ang u tih kha kan sawi leh duh a ni e. Aw le, Pu Lalchhuanthanga i lo sawm leh ang u.

**PU LALCHHUANTHANGA** : Pu Deputy Speaker, ka lawm e. Kan budget kum 2019-2020 chu kan han pharh ta a, i dinglama thute chuan a thatzia hliir mai an sawi a. Kei chuan a that em emna hi ka zuk hmu lem hranpa lova. Kan budget- ah hian a lan danin kumin kan budget tur hi 16092.30 crore a ni a. Heng atang hian sorkar inrelbawlina hlawh leh pension-ah khan 8,403.52 crore lai a kal a. Hei hi a tam tham hle mai a, chutih rual chuan hmasawnaa hman tur Capital Expenditure- ah hian 2,288.78 crore tih a ni a. Heta hmasawna atana sum awm hi a beitham hlein ka hria a ni. Nikum aiin 254.9 crore-in a la tlem leh zual a ni. Heta a lan danah hian mipuiin kan enjoy ve tur ang chi hi a tam lo hle a ni tih kha a chiang sa a ni.

Tichuan heng kan budget te hi Pu Deputy Speaker, nimina i sawi ang deuh khan mawlte in han sawichhuah ka tum dawn a ni. Kan budget cheng 10,692.30 crore hi kan hman zawh rual ruala kan leiba lo awm tur hi cheng 8447.92 crore a ni a. Sorkarin leiba kan neih tur hi a tam khawp mai a, kum 2011 census-ah khan Mizoramah mipui 1,097,206 kan awm a. Chutichuan leiba hi insem diat diat ta ila, mi pakhat a lu nung zel hian cheng 97,450 a ni a. Chutiang a lo nih chuan hei hi budget tha tak mipuite thleng phak budget kha a ang ta lo riauin ka hria a ni.

Tin, revenue kan han en hian kan lakna hnar ber GST kum kalta khan nuai 5,000 a ni a, tuna kan hmuh leh turah hian nuai 35,003 a ni a. A tamna ringawt pawh hi ₹ 30,050 lakh a lo ni ta a. Heng hi eng tia tih tur nge tih hi ka hrethiam lo a. Sorkarin engtin nge mipuite min rawk leh dawn ? Hetiang zozai, tax atanga kan han collect tur hi a ngaihna ka hre lova, nakinah kan Finance Minister pawhin a rawn sawi chiang turah lo ngai ta ila.

Tin, eng kan chhit man, nikuma mipuiin eng kan chhitnaa kan thawh khawm zat hi ₹ 19,817 lakh a ni a. Tun budget tharah hian ₹ 30,000 lakh hmuh kan han

inbeisei leh ta a ni a. Chumi awmzia chu kan eng chhit man hi a sang chho hle dawn tihna a ni ta a. Chungte chu mipui phurrit tur chu a ni ta a ni. Tin, Forestry leh Wildlife tihah te pawh hian nikuma kan pawisa chhunluh zat hi ₹ 249 lakh a nih laiin, tun budget tharah hian ₹ 350 lakh kan han beisei leh ta a. A sanna hi ₹ 100 lakh zet a ni a. Green Mizoram kan ti a, kan sawi kan sawi lai hian lehlamah kan ramngaw te hi kan ti chereu zel dawn em ni tih te pawh kha ngaihtuahna a awm thei a ni. Hengte pawh hi kan Finance Minister-in a rawn tihchian atan ka duh bawk a.

Demand for Grant-ah khan MPSC-ah khan advertising and publicity-ah khan ₹ 25,55,000/- lakh nikumah dah a ni a. Tunah hian a tlem ta duai mai a, ₹ 4 lakh-ah a tla hniam a. He pawisa hi advertisement tihna atan hman ni turah ka ngai a. Chutiang a nih chuan MPSC- te hian in advertise-na hi an siam vak tawh dawn lo tihna nge ni ang a, hna awmchhun pawh Hnam Run list atanga hnawhkhah mai mai tur a nih ang deuha helaia advertisement-a dah tlem ta hi a ni thei ang em tih te zawhna a ni bawk a.

Tin, Demand for Grant-ah khan medical treatment tih kha a vai deuh thaw hian a tlahniam fai deuh vek mai a. A then phe chu nasa takin a tlahniam a, hei hi han sawifiah deuh te pawh a ngaiin kan ring a. Kumin kan budget-ah hian kan sorkar hnathawkte hi an lo hrisel sawt tawh dawn em ni tihte pawh kha ngaihtuahnaah a awm thei ta a. Kan budget-a a lan dan hian sorkar hnathawkte hrekna ang chi hi a tam hlein ka hria a. Minor works te, major works te, other charges, office expense tih te leh vehicle te, supply and machinery tih te zawng zawngah hian kan budget-ah hian nikum kan pha lo fai deuh vek a. Hetiang a nih chuan kan sorkar hnathawk kan department-te hian engtin nge maw hna an thawh theih ang aw tih ka ngaihtuah deuh a. Tunlai thil man sang chho zelah a increase zawnga thil kal tur ni awm tak, a deduct zawng zela kan han kal te hi ka hrethiam lo a. Chuvangin, kan department-te hi hnathawk thei hian kan siam vak dawn lo nge ni tih te rilru-ah a lo awm ta a.

Engpawhnise, kan budget 2019-2020-a kan hman tur hi a tam tham viau a. ₹ 10,692.30 crore te hi Finance Minister-in, “A chi tur chauh a la ni e,” a ti leh nghal a. Chuvangin, pawisa hi kan ngah viau turah ka ngai a. Engpawhnise, kan budget-te hi dik tak leh fel taka kan hman theih chuan tangkai takin a hman theih dawn a. Hnam Run list-te kan ngai pawimawh viau a, kan budget-te hi khawbaw taka, diklo taka a nihna tur ang taka kan hman loh chuan a pawi viau dawn a ni. Kan hmuh

chhuah ang ang kan hman chhuah tura hi a hman lampang hi i fimkhur ang u. Deputy Speaker, ka lawm e.

**DEPUTY SPEAKER** : A tawk hle mai. Tunge kan sawm leh ang le? Opposition Group Leader Pu Lalduhoma, member zahawm tak i lo sawm ang u. Ani hian 15minutes a nei a ni.

**Pu LALDUHOMA** : Pu Deputy Speaker, SEDP atang hian kan tan ang a. ZPM hian policy tha deuh mai - Hand Holding, bana kaih policy kan nei a. Chumi tihpuitlin nan chuan Convergence Principles leh Integrated Approach, (thumrawn policy kan ti mai a), kan hmang a. Mizoram University-a thu kan zuk sawi khan MNF party aiawha thusawitu khan ZPM policy hi kan copy a ni tih kha a sawi tawh a. Chuvangin SEDP pawh hi hemi kan thumrawn policy copy-na a ni a, a principle in tha kan ti a ni. Tin, tunhnuah pawh kan kalpui zel dawn tawh hmel te in ka hria a. Amaherawhchu, a principle leh a scheme hi tha mahse a kalpui dan, a implement dan erawh hi chu her danglam ngai a tam hlein ka hria a.

Budget hi kumtin pun dan pangngaia pung chho a ni a, department sum pawh a pung chho zel a. Amaherawhchu, kumin budget-ah hian department lianpui pui 11 te khan nikuma an budget kha an phak ta lo tlat a ni. Engvang nge kan tih chuan SEDP-ah hian department sum hi kan sawkkhawm nasa lutuk a, sum hnar dang kan hria a zeng a ni baw si lo a. Chuvang chuan department sum kha kan sawk ta vak mai a. A mal mal-in heng department te hi hun a tlem avangin ka sawi lo mai ang a. Tlem erawh chu ka han tarlang ang a. Entirnan – Agriculture hi an 23.38%-in nikum an phak lo a ni. Lo nei mite tan chuan a beidawn thlak sa a ni. Commerce & Industries-ah hian 30.88%-in an tlahniam a, thalaite tan a beidawn thlak nghal a. Sports & Youth-ah hian 33.97%-in nikum budget an phak lo a, kan thalaite tan chuan a lungawi thlak loh viau a. LAD-ah hian 47.71 % lai, nikuma an budget zat ve awrh kha an nei dawn tihna a ni. Kan V/C te tan chuan kun ngawih ngawihna tham a ni. Chuvangin, he convergence policy kan kalpuinaah hian department sum chu a hnar dang kan hre lo a nih chuan kan pawt tur a ni, mahse, a lutuk hi a awm ve a. Hetianga kan pawh hian department te hmalakna kan tithuanawp a, an tan pawh a tuiawm loh zo dawn a, kan ti lutuk deuh em aw ka ti a ni.

Chutihlai chuan Council of Ministers budget han en ila, 40.20%-in a pung a ni. Mizoram sorkar kan hrawn tawh zawng zawngah sorkar hautak ber kan hrawn

dawn a ni. Kan Council of Ministers te hian eng ang lekin nge in vulh an tum ka hre lo a. Tunah chuan ruling MLA te zingah hian MLA fang kan tih kha pakhatmah an awm tawh lo a, eng Chairman emaw an ni fai vek tawh a. Sorkar hautak zet mai, mipui chhiah tlingkhawmin kan enkawl, a tlahniam zawnga kal ni lo a, a pung zawng zel mai, a tlaran zawng zela tun tum kan sorkar a kal tur hi chu a pawl khawpin ka hria.

Taxation Department han en ila, an budget hi 55.84% in a pung a ni. Nikuma an budget let aia tam in Taxation Department budget hi a pung a ni. Hei hian eng nge a kawh kan tih chuan, mipuite iptea sum fai hi kan sorkar hian min rawk a tum a ni. Hetiang khawpa chhiah lak tam tum sorkar hi tunah hian Zoram mipui hian kan hmabak a ni tih han hriat hian he budget hi a lungchhiat thlak ngawih ngawih a ni.

Tin, SEDP-ah hian a delivery system kha tha deuh mai awm pakhat ka hmuh chu kan entrepreneurs te tan loan te, grant te kan pe ang, bul tanna turin, sorkar hi guarantor-ah a tang ang tih inziak kha a awm a, a lawmawm khawp mai. Amaherawhchu, kum 2013-ah khan Mizoram Ceiling on Government Guarantees Rules pass a ni tawh a. Heta Section 4- na hi sorkar hi mimal emaw, private company emaw, private institution tana guarantor-a a tan khapna dan a ni. Khami ni khan nasa takin ka sawisel a ni, mahse pass luih a ni. Tuna SEDP Delivery System-a entrepreneurs te tana bul tanna tur lo awm hi ZPM in kan Hand Holding Policy chiah kha a ni a. Hei hi puitling se kan duh a, hemi tipuitling tur chuan tuna ka dan sawi kha kan amend a ngai a. A rang thei ang berin Session lo awm leh turah chuan he amendment bill hi lo hmuh kan inbeisei dawn a ni. Hetiang dan a awm chung hian vai company ISPAT te chu tunah hian kan sorkar hian pawisa a puk tir teuh a, guarantor-ah a tan sak tho si a ni.

A dawt lehah chuan tunhma lam te kan rilruah a awm lo thei lo a. I ding lama thu te kha kum 10, 1998 atanga 2008 inkara an sorkar chhungte kha kan rilruah a la awm a. Kha kha an sim tawh dawn nge dawn lo tih hi tun budget-ah hian kan rilruah a awm lo thei lo a ni. An han sorkar tirh khan fimkhur lo takin pawisa an hmang bawrh bawrh a, reilote chhungin Ways and Means-ah Vaibelchhe 72 an han puk pang a, overdraft Vaibelchhe 82.55 an nei a, contractor ten an bill an la thei lo a, an bill an zuar huai huai a. Financial emergency kha kan tawng lo chauh a ni, khatih lai khan. Chuvang chuan, central sorkarin an kal dan kha hlauhawm tham a an hriat

avangin ni 06/04/1999-ah khan MoU an sign luih tir ta a ni. Chutah chuan khatih laia sorkar, tuna i ding lama thu te khan chu MoU-ah chuan chhiah la tam turin an intiam a. Tin, sorkar hna 100 % ti tlem tur leh hna ruak hnawhkhat lo turin an intiam bawk a ni.

Chu chu an sulhnu a ni. Chuti chung chuan hma an sawn thei mang lo a, Special Ways and Means thlengin vawi tam tak an puk zui leh a. Hetianga kan kal zel chuan a tha dawn lo e tiin ZNP khan ni 18/03/2005-ah khan bill kan pulut a, chu chu Fiscal Responsibility Budget Management, Bill, Parliament leh State dangin an hman ang hi kan neih loh chuan kan sorkar hruaitute hian kan ram hi min tlukupi mai dawn a ni kan ti a, kan pulut a, amaherawchu min phar thlak sak a. A kum leh 2006-ah central sorkar-in a nawr tlat avangin passed a ni ta a, 2007-ah Rules kan siam a, tun thlengin hman a lo ni ta a. Hei hian leibat zat tur te, Fiscal Deficit zat tur te min tuk ta tlat a, a vauin min vau ta ang a ni a.

Tichuan, khami tipuitling tur khan tan an han la a, tui bill, electric bill, cubic lung thlengin, thingzai thlengin a let tam takin chhiah, royalties-te a pung a, inhmun chhiah te pawh nasa takin an tipung a. Hemi kan duh loh entir nan hian ni 28/09/2005-ah khan total bandh kan siam a ni, chu chuan tlemin a su thla ta deuh a.

Pu Deputy Speaker, vawiina he budget pharhtute hi hman ami te tho kha an ni. Hmana Finance Minister kha tuna kan Finance Minister hi a ni, hman a kan Chief Minister kha vawiin nia kan Chief Minister a ni. Chuvangin tun tumah hian engtin nge an kal dawn tih hi ngun takin kan thlir dawn a. Kumin budget-ah hian kan Own-Tax leh Non-Tax Revenue atang hian cheng Vaibelchhe 225-in a lo pung ta a. Hei hi khawi ami nge a punna hi? Budget-ah hian a punna kan hmuh chhuah chu mipuite hnen atanga chhiah tih pun hi a ni. Nichina kan ngaihthlak tawh ang khan Zoram mipui hian kumin chhung hian Vaibelchhe 225 hi kan ipite atangin kan tuak dawn a ni, a chiang reng, source dang pakhatmah a awm lo. Taxation Department budget a pun chiam nachhan kha hei hi a ni mai a, a chiang reng a ni. Sawr fu tur kan awm tawh lo ve tiin hmanah an au thin a, chumi te ngei chuan min sawr fu tawh thin a, vawiin-ah hian min sawr fu leh dawn a ang khawp mai.

Tunah hian Education Department-ah Group 'D' Muster Roll lehngal an la dawn a, application form kha ₹ 150-in zu hralh a mawle ? Excise Department-ah leh Department dangah pawh application form ₹ 150 a ni deuh vek tawh. Mipui min

hrek dan tur hi hetu hi a ni a, hei hi a chi tur ni loin a chi tur ber chu mipui atanga pawisa mi sawr fe hi a ni zawk tih hi kan budget-ah hian a chiang ngawih ngawih a ni.

A dawt leh ah chuan revenue surplus hi nei teuh angin kan in show ziah. Budget Session-a ka sawi ve fo thin chu, ' hei hi inbumna a ni ' tih hi a ni. Tunah hian kan Own-Tax leh Non-Tax Revenue atanga kan lakluh ve hi kan Revenue Receipt atanga 10.5 % chauh a ni. Chuvangin engti kawng mahin a tak takah Revenue Surplus hi naia khatmah kan neilo, neih a hnekin kan Revenue Receipt atang hian vaibelchhe 8814 hi a thlawna central-a kan dawn a ni a. Chu chu kan thawh chhuah angin kan sawi ve ta ngawt a, hetu zat hi surplus kan nei kan han ti hi Zoram mipui hi kan bum a ni, keimahni pawh kan inbum tel a ni. Surplus hi naia khat mah kan nei lo. Central-in min pek hi la ta sela Vaibelchhe 8,814 hi a bo ang, kan revenue receipt atang hian.

Tin, leibat chungchangah hian han pakai leh ila. Hmana an sorkar lai khan a kum tawp chauh kha ka'n sawi ang a, 2008 - 2009 khan kan leibat zat tur hi kan GSDP atanga teha 74 % pel lo tur a nih lai khan, an sorkar hmasak khan 3.5 % a tling a ni, an ba nasa em em a.

Tin, fiscal deficit-ah pawh kum 2009-ah khan 3% pel lo tur kan nih laiin 8.47 % an tawng a ni. Mizoram sorkar awm tawh zawng zawngah hian MNF sorkar hmasa tluka financial management-a hlawhchham hi an la awm miah lo, hei hi thudik a ni. Tunah hian, kuminah hian, kan debt hi, kan leiba hi 32.66 % a lo ni ta a, kan fiscal deficit hi 2.40 % a lo ni ta a. A Ceiling min tuk aia hniam daih a lo ni ve ve ta a, a lawmawm khawp mai a. Amaherawchu, lawmthu kan sawi dawn a nih chuan Finance Minister hlui Pu Lalsawta kha lawmthu kan hrilh tur a nih ka ring. Hei hi ama achieve a ni, vawiina kan sorkar achievement engmah hetah hian a la tel lo.

**PU LALDUHOMA** : Hman ang khan chhiah ti pungin min sawr fu lehin mipui phurrit min barh leh nasa dawn hle em tih hi kan thlir dawn a ni, he sorkar hi. Tichuan, thil pakhat hmanna budget present ni a kan Finance Minister zahawm tak in ziaka tel silo, helai verbal-a statement a siam kha mipui min hruai kawu thei deuh thil a nih avangin han sawifiah ka duh a. Maharashtra state-in lei an bat tam zia min hrilh a nih kha. Mizoram state leibat let tam tak Maharashtra state-in an ba a ti a, kha

kha a dik lo a ni. Leibat zat a figure ringawt kan sawi dawn chuan an bat loh zat pawh a tam zawk daih ! Leiba hi engtin nge an chhut thin ? GSDP atanga chhutin engzat percentage nge tih hi chhut dan a ni. Vawiinah hian Maharastra chuan 16% leiba an nei. Keinin 32% chuang kan ba a, Maharastra sorkar aiin kan leibat hi a letin a tam a ni. Chuvangin he House-ah hian mipui hruai kawi thei thil kan sawi hi a tha ka ti lova. A nih dan ang tak kan inhrilh hi a thain ka hria a ni.

Tin, kan GSDP hi kan hmu a, kan estimated GSDP kha kan hmu a. Hetah hian kan GSDP a pung kan ti fova. Mahse a punna hi enge ni ? Sorkar hnathawk hlawh te a lo pung a, kan GSDP a pun phah a, keimahni thawhchhuah tak tak atang hian kan GSDP hi pun tak takin a la pung ngai miah lo. Primary sector te, industrial sector te, service Sector pathum te hi thlir ila helai primary sector, kuthnathawka eizawng 70% vel mihring awmna hian tunah hian 29.93 % hi kan GSDP ah hian an rawn thawh ve chauh a ni. Kan GSDP hi ruai ni ta se kan kuthnathawktu 70% te hian a chawtrani an rawn tum ve thei tawk tihna a ni. Chuti khawp chuan kan mipui tam berte dinhmun hi a la chhiain a la hniam a ni. Chumi chawikan tumna chu he budget-ah hian hmuh kan chak ber leh kan lo beisei a ni a. Beisei a bo khawp mai. Chuvangin hma kan sawn kan ti a nih chuan kan GSDP a punnaah hian Sector pathum zinga Primary Sector, kan kuthnathawktute awmna atang hian a pung em ? Hma kan sawn em tih hi kan thlir tur a ni .

Helaia tute emaw Contractor thil sum lak luh vel mai mai, khatiang bawr vel avanga pung mai mai a nih khan awmzia a nei lo thin a. Chutiang bawkin kan per capita income te pawh hi a ni ta zel a. Kan budget speech-ah pawh hian per capita income hi a lang lo reng reng a. Budget speech-a per capita income a lan loh vawi khatna a ni hial awm e. A mak ka ti khawp a ni ! Tichuan kan per capita income te pawh a lo pung zel angin kan chhut a. Sorkar hnathawkin 7<sup>th</sup> Pay te an han la a, chumi avang chuan a pung mai mai a ni. Production vanga pung a ni lo. Kan mipuiten an thlai thar an hralh em ? Kan thalai ten eizawna entrepreneurship lam atangin production an siam tawh em ? Chumi tur chuan ruahmanna a awm em ? Chutiang ni chuang si lova hetiang a per capita a lo pun dan te hi keimahni atanga mipui mimal tin zawn leh chungkaw tin zawn atanga rawn chhuak a nih si loh chuan, a figure ringawt bakah hian lawmna tur a awm lo a ni.



Pu Deputy Speaker, a tawp berah chuan ka sawi duh chu, mihringin a tel loa a awm theih loh, kan Basic Needs a address lo. Basic Needs te mipuiin kan nei dawn em, chuta tan chuan ruahmanna a awm em ? Kan kuthnathawktute tan kut benna tur a awm em ? Kan thalaite tan kut benna tur a awm em tih hi kan thlir a ni a. Chuvangin, kalphung pangngai, kalphung hlui thovin sorkar hi a kal dawn. Sorkar hi an inthlak thin a, Chief Minister chair-a thu an inthlak thin, Ruling party an inthlak thin, a system, a kalphung erawh chu a inthlak thei chuang lo a nih hi. Chuvangin, keini chuan a kalphung thlak hi kan duh a. Kan budget kalphung atang lo hi chuan system hi a thlak theih baw si loh va. Kum 5 chhung chu kalphung hluiin kan kal leh dawn tihna a ni a. A lungngaih thlak khawp mai ! Ka lawm e.

**DEPUTY SPEAKER** : Aw le, a lawmawm hle mai a, member zahawm tak tak ten kan han sawiho a, member 24/25 bawr velin kan sawiho niin a hriat a. Engpawhnise a lawmawm kan tihna chu kan budget-ah kan Chiang a, a lawmawm ka ti a. A digit thlengin kan sawi thei deuh tlangpui mai hi a lawmawm ka ti tak meuh meuh a, tun anga budget discussion sawihonaa hetiang taka member ten a chhung thu kan chian dan hi a la awm awm lo mang e aw, ka ti a. Tum dang ka demna lam ni lovin tum dangah chuan a policy matter kan han tih, a thil tum ram ni lo a pawnah kan sawi kual nasa thin a. Vawiinah chuan a chhung kan han luh chilh a, hei hi a bul takah chuan kan Finance Minister zahawm takin budget te hriat thiam theih leh hriat thiam awl taka min han chhawp chhuah dan kha a ni lo thei lo a ni tih kha vawiinah ka sawi duh a. A chungah pawh he ka thutna atang hian lawmthu ka sawi a ni.

Tunah chuan kan annual budget for the year 2019-2020 chu kan sawi zo tawh a. Chief Minister zahawm tak, kan Finance Minister ni baw hi wind-up turin, a tlangkawm turin i lo sawm ang u le.

**PU ZORAMTHANGA, CHIEF MINISTER** : Pu Deputy Speaker, ka lawm e. I sawi ang khan kan budget kan han sawi khawm a. Mi eng emaw zat, ka tawng tu huatthu suh ah, kan vawikhatna House-ah a ni chung pawhin kan han sawi kha mi term hnih, term thum House-a lo awm tawh ten lo ngaithla se, a puitling an tiin ka ring a, a chhuanawmin ka hria a. Budget speech kan han kalpui dan ah thil kan Chiang tlang khawp mai a. Keini a wawi khatnaa House-a kan han lut a, budget discussion kan han neih ve a kan bangbo zia te kha ka ngaihtuah a. Vawiiina kan

sawi khawmna kha a ropui ka ti a. Puitling taka sawi khawmna member zahawm tak ten kan nei vek a, a ropui ka ti.

Tun-a kan Deputy Speaker-in a han sawi ang khan tun hma eng emaw chen chu, kan budget hi sap tawngin kan dah a, essay type ang deuhin. Khatia present a nih avang khan member tam tak tan a number nen, a percentage nen zuk chhuta han tih hi a har em em a. Chuvangin kan sawi pawh hi duh thu a sam lova. Mahse tun tum chu Mizo tawng te in kan ti bawk a, hriatthiam awlsam chi in, a point te in kan han chhawp a. Khangte pawh khan eng emaw chen a tanpui ve ang tih kan ring a. Keini chauh ni lovin, kan budget speech buatsaihtu lehrawn frame-tu kan department hotute pawh an lo puitling tawh hle a ni tih min hrihlin ka hria a, lawmawm ka ti a.

Member zahawm takte in thusawi constructive tak tak, a thenah in han sawiselna leh in han sawi bawrh bawrhna karah khan keini tan, ruling lam tan pawh, Finance Minister tan pawh zir tur, rilrua hriatreng tur thil tam tak min pe in ka hria a. A hmasain kan discussion hi midang zawng aiin kei pawhin ka hlawkpuiin ka hria a, lawmawm ka ti tak tak a ni.

Pu Speaker, min lo hrethiam la. Thil pakhat ho te, keiin inzir nana ka hmang ang deuhin kan vai hian kan inzirna ni zel se la. Kan budget kan han sawi pawh hian midang nena kan sawi khawmna hun te pawh a la tam zel ang a. Budget a ni lova, 'buget' ti a lam tur a nia. 'D' hi awmlo ang a dah tur a nia. Judgement a ni lova, 'jugement' an ti a. Sap tawngin 'dg' hi a awmdun chuan 'g' sound-a lak a ni a. Chuvangin budget ni lovin 'buget' a nia. Kha kha kan vawi khat hriatna te a lo nih takin ka han sawi mai mai a ni.

Tin, a dawt leh ah thil eng emaw a hmatheha han hman, kan bag te hi a va hlui ang reng ve tih kha a dik khawp e. Engpawh ni se nakum lamah chuan bag tha deuh, session chhunga khai itawm deuhrawn present kan tum tawh ang e.

Aw le, kan budget hi han sawi hian, heti hian mipuiin eng ang pawhin han sawi mah ila a percentage-a kan dah te, technical word kan hman te, a number kan han paih, kan puntir leh tihah khan keini tan pawh a har a nia. Mipui tan chuan kan budget hi han sawi ila, pakhat thil chhut thiam deuhin a sawi chuan 'a ni maw, a

budget siamtute chu an va laktlak loh e. A budget chu a van chhe em em ve' tiin a sawi chhuah theih a.

Tin, a fak zawnga sawi chuan 'a tha hle mai, tun tum an budget chu a tha dawn khawp mai' ti pawhin a sawi chhuah theih a. Engpawh ni se, ram-ah chuan India rama tuna kan awm chhung hian a kal dan pangngai a awm a. Central sorkarin keini special category state te chu min rawn puihna tur, Finance Commission atang te, tax chi hrang hrang atanga min puihna te, development-a kan scheme siam kha chu thu hran ni se, khang kha a awm sa phawt mai a, an rawn tih ngei ngei tur, chung chu a awm sa a. Tin, keini state-in kan chhiah lak khawm atanga kan lo tum ve tur a awm a, kha kha kan lak khawm tam leh keini kha kan vannei, hman tur kan ngah a ni mai a. Nikhat ₹ 100/- hlawh thin khan ₹ 200/- kan hlawh theih chuan a hlawhtu kan vannei a ni mai a Nagaland hman tur a ni lo a, Manipur hman tur a ni lo a. Keinin kan rawn inlak chhuaha tax kan rawn dah khawm tam chuan Mizoram mipuite hman tur a ni leh mai a, chu chu ' a tam thei ang ber rawn inhnit chhuah ve tum rawh u', central-in min ti a. Chumi nen central-in min rawn pek thin pangngai a head chi hrang hrang Finance Commission leh thil dang te; tin, keimahni state atanga kan thawhchhuah ve te leh sorkar laipuiin NABARD-ah hemi loan-ah hemi hi in la tur a ni an tih loan kan lak ve te nen kan han dah kawp ta a. Chumi chu engtinngge kan hman ang tih kha a ni a. Tun hma chuan plan leh non-plan-in kan kal a, plan lamah chuan development a lo ni a, non-plan-ah kawng chi dangin. Kei ka budget ken hmasa ber phe chu 1998-99 chhoa kan plan fund neih te kha vaibelchhe 259 a ni a, tun anga department pakhat hman pawh hi a pha lo a ni. Kha kha kan han kalpui a, khata tang khan tupawh sorkar ila, punna pangaiin a rawn pung chho zel a. Tunah chuan sorkar-in a tharin plan leh non-plan pawh awm lovin hman pawlh theih a ni e. Amaherawhchu, thenkhat a hmanna bik tur chi nei chu a awm a, chumi tih loh chu hman pawlh theih vek a ni tawh e, tiin a total-ah vaibelchhe 259 plan fund a hman thin khan, tunah chuan vaibelchhe 10,000 leh tih hman kawp theih kan han ni hi chu hmanna budget-a ka lo present hmasak nen han khaikhin khan a ropui hi ka ti em em mai a ni. Chuvangin kha kha a tlangpuia kan budget kan han hman chhohna chu a ni a.

Tin, chutih laiin loan in la tur a ni, NABARD atangin heti zat, chumi atangin chute zatan tih min tuk leh loan lo kal chho leh keimahniin kan bat lo awm nen kumtin kan leiba hi a pung chho zel a. Tunah pawh 2015-16 a kan leiba chu

vaibelchhe 6,407 a ni a, 2016-17-ah khan 6,725 a ni a, 2017-18-ah 7,300 a ni a, 2018-19-ah 8,000 a tling tep a, 7992 leh tih a ni a. Kha kha sorkar hmasa te hetiang leiba neih, in va han fel lo tiin mawh kan pe thei lo reng reng, thil hi a ken tel hi a awm a ni. Chuvangin kei pawh sorkar hmasaa, tun hma 1998-2008 inkara Finance Minister ka nih lai khan kan leiba hi a pung chho zel a. Khatih lai kha chuan vaibelchhe 3000 bawr vel a ni a. Tikhan mipui hnenah 'leiba heti zat kan nei a, mipui lah chuti zat kan ni si a, mitinin leiba kan insem chuan mipakhatin cheng 1000-10000 ba ang kan ni' an ti a, mipui engmah hre lo tan kha chuan lungngaia kun rengna tham hian kan chhuah ! Mahse a ni miah lo, keini aia ba tam kha an lo tam em em mai a ni, ka sawi kha. Vaibelchhe nuai chuang ba state lianah chuan an lo tam mai, chuvangin tunah pawh hian en ila kan leiba ringawt (PU LALDUHOMA : Pu Speaker, kha kha a bat zat tih ringawt kha kan sawi dan tur a ni lo vang, percentage to GSDP a sawi loh chuan a misleading lutuk. Kum tina tuna a pun dan han sawi pawh kha a percentage zawk kha sawi tur a ni a, a tlahniam zel zawk a ni, MNF sorkar loh hnuah khan.) Pu Speaker, nikuma leiba a punna hi 2018-19 hi chu kan sorkar hman loh ang tluk deuh thaw a ni a, khami lo kalah khan vaibelchhe 692-in a pung a ni, kumina kan teh in 555 velin a pung dawn a. Amaherawhchu hei hi chu rindan a la ni a, a tlangpui thuin en mah ula 1990 chho, 2000 chho atang khan a pun dan hi kumtin hian 300-a pun a awm, 400-a pun a awm, a pangngaiin a pung chho zel a ni, kha kha midangte hemi avanga va sawi lungngaihna chi a ni lo.

Chuvangin Pu Hawla sorkarna hnuaiyah pawh a pung pangngaiin a kal mai, kan sorkarna hnuaiyah pawh a pung pangngaiin a kal mai. Naktuk-ah hian Pu Liana, Pu Mawia sorkar mahse a pung pangngaiin a kal mai. India sorkar finance kal dan pangngai hi a ni, a history kha en ila, a ni vek a ni. Chuvangin, tunah mipuiin kan chawhrualin cheng chutizat theuh ba ang kan ni ti ila, in dawmkuna thu reng tur kan ni miah lo. State dang pawh heti vek hi an ni tih kan sawi duh a ni.

GSDP chu improve kan tum ber a ni a, kan SEDP hian mipuite income hi a taka tihpuntir tumin, a nuai bi a an kumtin income an lakluhna turin, anmahni hnathawhna tur kha theihtawpin thuam chhoha, an kumtin product tihpun hi a target pui ber a ni tih ka sawi tel duh a ni.

A dawt lehah chuan kan state owned resources hi tihpun in tum tam a, heti a nih chuan chhiah lak tam in tum vak a ni maw in tih kha, chhiah chu a pun chin a awm a, entirnan keimahni control-na piahlam ami a awm a ni. Entirnan, electricity bill-te chu kan state regulation, Manipur-te nena kan intawm ten an en a, 'hei hi a awm tawh e' an rawn ti a, anglo lutukin an tisang ngai lova. Amaherawhchu, zawi zawi erawh chuan a rawn pung ve thin, chhiarkawp chi hrang hrang an neih avangin.

A pawimawh ber chu heng kan chhiah hi tipunglo mah ila, a lakkhawm dan hi kan tih efficient chuan, thahnem kan ngaih chuan nasa takin a pung a ni. Entirnan, tehkhin remchang a ni em ka hre lo, Kohhran lian takah kan awm a, kan Kohhran thawhlawm tlingkhawm chu heti zat a ni. Tatang khan hmun thuma thena hmun khat hawk an in dang 'E ! a va tlem dawn', kan ti a, an kal chho a, a ngai deuh reng mai. Hengah hian keinin kan tum chu hemi chhiah kan lak tur lak loh, kan system a la efficient loh avanga kan lak loh hi ka rin danin hmun thuma thena hmun khat mai ni lo, a thenah chuan a chanve hawk a nih ka ring. Chumi a nih avang chuan Pu Speaker, chhiah lak dan hi entirnan, computerized system-ah te kan kala, mumal taka kan kal chuan kan ram chhiah pangngai tipung miah lova kan lak tur kan lak loh zawng zawng hi han la thei phei ila chu khitah a chho ang. Chuvangin, hei hi kan taxation leh kan collection system hi nasa taka improve kan tum a ni. Tipunglo pawhin a amount chu nasa takin kan collection, kan lakkhawm dana hi kan efficient tir/kan tihthat tir chuan a pung ang. Chu chu kan target pakhat a ni bawh a ni.

Tin, ka sawi leh duh chu he kan budget present hi typing mistake kan tih ang chi, patent error leh eng eng emaw chite a awm teuh mai a, an sawi ang khan kan hmanhmawh tlang a. Tun tum chu min hriatthiam ka duh a, a number chhut soal palh te, belh soal palh te, eng eng emaw te pawh, 692 tih tur 962 zawka chhut palh tih te pawh a awm a. Engpawhnise, khatah khan member zahawm tak ten min hriatthiam ka duh a. Tin, tun tum kan budget hi sawi leh sawi hnu, tikhan kan inthlang a, kan ri rup rup a, buai takin December ni 15-ah charge kan la a, kan zo a, Christmas/Kumthar kan ri luai luai a, tumah office pawh awm lovin. Tikhan kan han tan fel dawn chauh a MP kan han thlang leh a, campaign leh thil dang buaiin, kan inthlan zawhah

pawh a thla chuang zet mai Election Code of Conduct-in che thei lovin min han ti leh a. Hei tunah Election Code of Conduct-in min phelh atang chuan tun hi chawlhkar thum pawh a la ni mang lova. Kan han ti chuk chuk a, kan rawn chhuah a ni a. Kan official ho pawhin rinai takin an rawn chhuah fel a, a lawmawm a. Mistake leh chhut soal palh tam tak a awm a nih pawhin min lo hriatthiam ka duh a ni.

A dawt lehah chuan nikum aiin engatinge a tlem, nikum aiin engatinge a tam tih kha a dik khawp ang. Engpawh ni se, tunah chuan nikum budget kha chu sorkar hmasa buatsaih a ni a, kan buatsaih a ni lova. Kumin ami hi chu hmanhmawh takin, a mam tha kan tichuang bik lova. Ngaihtuahna thar nena keini buatsaih a ni ve thung a, chuvangin a inang hauh lovang a, kan dah duh dan pawh, kan han en khan kan ngaihtuahna engkim, department-in hetia an kalnaah hian enge tul manglo a tam em tihte kan indemna ni lo se. A hlui kan chhawmah kha chuan Zun in leh Ek in siamna turte kha a crore tel-in a tam a, chung chu kan han siam dawn a, khawpuiah pheih chuan kan In bulah hian Ek in siam kan phal hlei nem, kan in bulah Zun in siam kan phal hlei nem an ti a, a tih hleitheih loh a. Step siam nan lo hmehbel mai rawh u, khang zawng zawng kha a kal tawh si a kan ti a, a hman leh dante kha kan ngaihtuah ta a. Meizuk khap inzirtir nan 200 lakh dah han tih te, khatiang khan ngaihdan kha a inanglo tam khawp a, budget hmasa nen chuan a inanglo viauin ka ring reng a.

Amaherawhchu, khami kan han kalpui nanah khan a tira kan chhawpna hi hmanlai kan Mizo sawiin sawi ta ila, kan khumai hnuaia kan thing keuh leh rapchunga kan thingfak rep hi a tam dan, kan duh a inan loh pawhin a khawnpuiiah tal hian lo tam sela. Heta mi a tlem pawhin a khawnpui ami kan va pawm lut ang a, a tul ang zelin hetah hian kan dah dawn nia tiin Finance lamah khan kan han dah khawm a, a tul ang zela hman turin. Amaherawhchu, SEDP-ah erawh chuan kan 'flagship programme' a ni bawh a, 750 crore lai kha kan han dah a. SEDP-a hman tura a danga SEDP tih hming pe chuang lo va kan dah nen kha chuan sang a chuang daih a ni. Amaherawhchu, a hming tak kan zuk dah lai kha 750, hemi chinah hi chuan dah khawm ang u hmiang kan ti mai mai a ni. SEDP-a kan programme puia kan hmanna tur kha chu sang a chuang daih a ni. Chuvangin, khami tur ang khan kan kal a, chu pawh chu a chi tur a ni kan tih kha. Chuvangin, kan tum hi matching

share pawh a thenah chuan kan phuhru zo ang em ka ti a. A tam ber chu Delhi-a budget pui kan tawm tur khu a ni a. Hemiah hian ka han sawi duh chu ka information hi tlemin a hlui deuh a, kum hnih kum thum kal ta central budget pawh kha vaibelchhe nuai 23 plan leh non-plan anga a total kha a ni a. Entirnan, han hisap ta ila, vaibelchhe nuai 23-ah chuan a tam zawk 13 kha non-plan anga hman tur pawhin han hisap luih sak ila, a dang vaibelchhe nuai 10 kha plan anga hman tur angin hisap sak ta ila, chu chu Govt. of India budget a ni. Vaibelchhe nuai 10-ah kha 1/10 hi North East tana reserve a ni a. Chu chu vaibelchhe nuai 1 tihna a ni. Chu chu state 8 hian inzahsem dawn ila, vaibelchhe 12,000 kha Plan Sector anga kan zuk dah kha, kan chan tur daih a ni. Amaherawhchu, kha kha chu a thawk chak chak a ni mai. Vaibelchhe 12,000 central-in kan neih tur anga an lo dah kha a chanve chanve leh pawh hi tu state mahin kan hmang pha lo reng reng, a tam lutuk a ni. Chu chu a nih avangin central-in an plan-ah chutianga an hman tur alawm kan ti a ni mai thei. Central hian a nihna takah lo hi antam huan tiat pawh ram an nei lo reng reng, state leh U.T ta vek a ni. Rashtrapati Bhavan dinna nen lam khuan Delhi Union Territory ram chhung ami a ni. Leileta siam turin anmahniin tin za hmun pawh an nei lo reng reng! State leh U.T a hman vek tura heng hi dah a ni.

Central-in mihring pawh an nei lo. State leh U.T in kan thawkhawma central sorkar khu 'run' mai mai a ni. Chu chu a nih avangin India ram budget, amaherawhchu, sipaia hman tur te, central-in a hman tur pangngai a awm. Development-ah chuan an hmanna tur chu Agriculture lamah leh thil dangah phei chuan anni-in direct-a an hman tur a awm miah lo, state-a pek vek tur a ni. Chutiang khawpa tam chu central-ah khuan pawisa a awm a.

Pawisa in hmang zo dawn tih a ni lo, in thawk chak lo, engatinge min ti vek a nih kha. Chu tak chu a zuk hai chhuak thiam apiang state hi an vanneiin an chak mai ang. Chu tak chu keini pawhin zuk hai chhuah kan tum tur chu a ni a. Entirnan, sawtah sawn mel 10 bial ram parh cham dur mai maupui hmun a awm a, lovah va nei ula, tin sawm hmun in neih chuan phur 200, 500 in thar ang. Chuvangin, khaw lalpa in buh tin 10 a chi ah; tin 20 a chi ah va nei rawh u min ti a, khatah kha a va nei tam apiangin chhipzawn/kakzawn an va nei mai a ni. A nei peih lo chuan a buh chi kha Bingtaii anga a kan puah zel chuan a ngai ah a thu mai a ni. Chu chu kan kar a hla em em. Chuvangin, tuna kan tum chu he ram hi a chi min pek hmang hian thil dang kan hnuk lut ang. Hetia kan tih phawt chuan entirnan, an hming kan

phuahchawp mai mai pawh 'Peace Bonus' kum 13 hnu-ah kan dil a, a genuine a an hriat chuan kan dil aia tam cheng vaibelchhe 183 deuhthaw min pe mai a ni. BAFFACOS kan ti a, a hming kan phuahchawp pawh Mautam dawnah kan convince thei a. An thilungin a dik an tih chuan a crore telin min pe mai a ni. Central-ah hian pawisa a tam em em a ni. A hmanna erawh chu member zahawm tak ten in sawi ang khan a dika, khulamin min pawmpui a ngai a ni. Chulaia chu heta tuna kan budget pawh hi a chi tur a ni kan tih hi a ni tak tak a ni. Nichina kan sawi vaibelchhe 12,000 chuan min daih hrim hrim.

Kum 3 vel kaltaa an budget a tlem zawnga plan fund kan zuk dah pawhin tih kan sawi kha, kha kha chuan a nihna a la phawk phalo zawk a ni. Chuvangin, keimahnin kan thawhchhuah tam dan a zir zel hian a awm a ni tih kha hemi kan budget pawh hi chumi a zu kawih chhuahna kawihsapir atan chuan state matching share pawh in nei tur a ni min ti a. Tihfuh pheih chuan state matching share pawh hi heta ram min lo pek a kha, kha kha khatah khan kan include mai ang a ti a hetia tih tih chuan hmanlaia 'vaibel hi tlaiah kan lo pawm mai ang e' an ti e tih ang deuh khan hetia a ram a pawh hi matching sharea zu lak theih tur hian matching share tak taka cheng khat mah pe lo hian kan project hmasa tam ber kha chu kan ti zo vek a ni. Chuvangin, khati khawp khan central hian hriat pawh hi min hrethiam a ni. Engpawhnise, khatiang khan kan nei teuh a ni tih ka han sawi duh a.

Tin, chulo ah chuan tuna kan han target pui berah chuan Mizoram-in kan asset, kan ro neih ropui ber chu ram a ni, square kilometer 21000 chuang a ni. Amaherawhchu, neih theih hi chu sing 3 aiin a tam ka ring. Hetia tlangchho lo chhuk leh a pang lehlam lehlam neih theih kha a chung a air mail atanga teh a nia 21000 hi chu. Hetia ben pheka neih theih chin chu ti ila, sing 3 aiin a tam daih ang. Chu chu a neih theih pangngai vek a ni. Chuvangin, ka rin danin Mizoram mipui hian tunah hian ram hi insem ta ila, in tin hian tin 30 atanga tin 40 hmun chuan kan ram hian min daih vek a ni. Chutaka chu zuk utilize kan duh chu a ni a, chumi utilize-na chu SEDP-ah hian kan ram thawhchhuah hi ti a Delhi-a an khawngaih dila kal kal ngai lova, hetah hian mahnia intodelh ve engemaw chenah intodelh ve thei turin awm rawh u, awm rawh u Delhi-in min tih thin ang hi kalpui kan tumna lai chu a ni a. Chuvangin chaw-ah kan intodelh ang a, kawngtha kan nei ang a. Tin, leihnuai hausakna kan la ang a, leichung hausakna kan nei ang a. Chung zawng zawng atana he kan SEDP hi kalpui a ni a. Amaherawhchu, kha kha chu a economic site-ah ni



sela. Amaherawhchu, tuna infrastructure leh department thil ah kan mamawh tamtak a awm a. Chungte chu han dah loh theih loh a ni a. Entirnan, Education-ah khan kan dah belh loh chuan tihngaihna a awm tawh lo, kan hre vek mai. Zirtirtu 1 chauh awmna te, khang kha a ni si a. Chuvangin, tihngaihna pawh a awm lova. A khua mi lak target-in MR type-in i kal phawt ang kan ti a ni. A va dik chiahlo ve an tih pawhin, ngawi teh u, a thlarau in a mamawh a ni si a, heng hi kan tawngghiat loh thiam ve chhun chu a ni kan ti ringawt mai a ni. Chuti lo chuan tihngaihna a awm tawh lo. Chuvangin, Education-ah tikhan kan rawn ti a, a mamawh ang zelin hna nghet pawh kan ti hleithei bik tawh lo.

Tin, kawng pawh a tul lutuk, kan hre vek, fur hmasaa kan tawrh kha! Chuvangin, keini pawh mi pakhatin min tih ang deuhin, ‘nangni MNF ho hi in han sorkar ve dek dek a, referee whistle ham pawh in nghak lova, in pet nghal bawrh bawrh mai a,’. A ni bawh lah tak a, ni 26-ah ruai kan theh a, 27-ah khan kan han pet nghal bawrh bawrh mai bawh kha a ni a. Amarawhchu, hei a tha phian a ni ang chu. Hei, in kawng siam hi rin aiin a ziaawm ta khawp e, tunah chuan Lawngtlai atang pawhin hma deuhah kan rawn thleng thei an ti a. Khangte kha kan tifuh ta phian a ni ang chu. Hengah te pawh hian kawng kan sawi chuan ka sawi duh chu, kan tum anga kan chak lohna kha chu Election Code of Conduct kha chu thuhraan ni sela, Road roller kan lo nei tam tawh lova, durmut-a chhut ngawtin a tih theih tawh si lova, Road roller 20 lei ang kan ti a, a awm awmin kan lei a, a lo thlen hmian Election Code of Conduct-in min dang leh si a, a tang leh si a. Kan tum angin kan ti thei lo. Pathianin rem a tih chuan thal lo awmah chuan Road roller Division tina kan dah chuan awlsam takin pouching leh i mai mai hi chu awlsam takin a tih theih a. Heng hi chu kan tih theih chhoh zel kan beisei a. Chuvangin, kawng atan pawh khan kan rawn dah tam reng a ni. Tin, a tul a nih chuan dah belh zel pawh kan tum a. SEDP leh Finance-a kan neih ang ang kha chu nichina ka sawi ang khan a thingkawnpui ami a tul ang zela pawmluh tura kha kha chu kan ruahman a ni.

Tin, chu lova pawimawh em em Health Care-ah hian engzat nge pawisa la awm tih ka zawt a, crore 150 chuang chu a lo la awm a. Health Care Society-a crore 150 chuang awma hi khawi ami nge ka ti a. ‘Hmanah Asian Development-a in sawi chhuah kha a pung zel a’ an ti a. ‘A nih, an dah belh em? ka ti a. Tumah an la dah belh lo’ an ti a. ‘E khai, ngawi rawh, keiman ka dah hmasa ber ang e’ ka ti a. Tichuan Corpus Bank budget atangin crore 50 dah belh ang kan ti a. Khati a nih

chuan crore 200 a ni ang, an ti a. ‘Kumina a taka hman turin crore 20 i belh ang’ ka ti a. ‘Tichuan crore 220 a ni ang’, an ti a. Amaha pung lo awm nen khan khami kha theihtawpin peipun dan kan ngaihtuah ang a, dah belh dan kan ngaihtuah ang a, kan mipuite hriselna lamah MLA te zawng zawngin harsa kan ti theuh, kan bial ami te damlo hrehawm tak si, puih loh theih loh, puih dawnin pawisa kan nei bik si lo, puih loh dawnin khawngaihthlak bawk si, khami kha Health Care-ah hian theihtawpin tih kan tum a, tih takzetin kalpui kan tum bawk a ni.

‘Education-ah te, kawng lamah te, Health Care-ah te, Nurse leh Doctor lakna tur pawh kha enge in mamawh ?’, kan ti a. ‘Crore 60 vel chu kan mamawh ang’, an ti a. I dah ang, kan ti tawp mai a ni. Kan inhnial chhin lo reng reng ! A mamawh ang kha chu kan dah mai a ni. Chuvangin in tih dan hi a tha em maw ni le, tih tur te pawh a awm ang. Mahse, a tak taka thawktuten mamawh an tih kha chu an han ti phawt ang a, a tul chuan kha kha chu kan thuaiphui zel ang.

Tin, sorkar hnathawk hlawhte pawh kha za-a a chanve aia tam te pawh kha pension leh rahkam a ni tih kha a dik, a dang nen pheichuan kha aia tam zawk kha a ni a. Member zahawm tak Pu Ngunlianchung’a’n a rawn sawi kha ‘tam’ a ti a. Amaherawhchu, a har zia chu ani pawh CEM a nih lai khan, “Sorkar hnathawk hlawh kha engzat percent nge an hman ang aw” ka ti a, 90% a nih ngei chu ka ring a. Engpawhnise, tunah hian a tlem thei ang ang te pawh kan tum a. Tunah hian 7<sup>th</sup> Pay te a lo kal leh tawh si a. Hemi nena kan han kalnaah hian kan phur hi a rit ve khawp mai a; mahse, Pathian tanpuina leh mipuite zarah hemi hi kan chhu chhuak zo ngei ang tih kan ring a. Chuvangin kan budget pawh hi mipuite leh midangin min lo teh sak tura ka ngaih chu kum 1990 leh 1989, khalai Pu Hawla sorkarna kum 10 bawr vela kha a budget chhiarkawp leh thil dang mipui hrilh dawn ila buaithlak lutuk, an hrethiam lo. Kum 1998-2018 ka sorkarna chhunga ka budget kha, hei, chutah a dik lo, chhiarkawp nen, eng ang pawhin hrilh mah ila, mipui tan chuan hriat a har em! An kal chungin development eng angin nge a kal, kawng a tha em, mipuiin hmasawna an nei em tih kha an tehkhawng a ni. Chuvangin tunah pawh hian kan budget chhiarkawp hi eng ang pawhin hrilh mah ila, a then chu an bo tulh tulh ang. Amaherawhchu development-ah kawng that dan, mipuite eizawna kan siam dan, sorkar hnathawkten facilities an neih dan leh thil dang zawng zawng ram development atangin mipuiin an rawn teh a ni. Kha ber kha a pawimawh a ni. Chuvangin tun tum budget-ah hian kan duhthusam pheichu a ni hauh lo,

amaherawhchu, kan theihtawpin kan han ti ang a, rin aiin a tamna chu vaibelchhe sing chuang plan leh non-plan hman chawhpawlh theia Finance Minister kuta a han awm hi, hmana plan vaibelchhe 259 buaipui thin tan chuan a ropui hi ka ti tak tak a. Hei hian eng emaw chen ram kan siam a nih loh chuan kan ze lo a ni ang tiin challenge ropui takah ka ngai a. Member zahawm takte cooperation na in kan ram hi chu hei hi chuan nasa takin a hnukchhuak ang tih ka ring a. Chumi beiseina nen chuan he budget hi kan theih tawkin kan rawn present a...

**PU ZODINTLUANG RALTE** : Kan budget buah khan rua atanga intodelhna tur anga kha speech-ah khan a awm lova, tuna wind-up ah khan i rawn sawi tel ka lo beisei deuh a. Rua atanga kan intodelh dan tur leh khawi atanga intodelh tur nge tih kha. Kha kha min lo hrih leh se, hun kan la ngah tho a.

**PU ZORAMTHANGA, CHIEF MINISTER** : Aw le, min cho chhuah laklawh chuan in thu peih lovang tih ka han hlau deuh mawle. Tin, Niti Aayog-ah khan thil dang sawi mang si lova tih kha, kan sawi tur subject kha an ti sa vek a, (SPEAKER: Nia, khalai kha tlem han sawi teh khai) written statement-in rawn ti phawt ula an ti a, an subject rawn tih sa kha. India ramah kumina tui in tur neih loh avanga hmun thenkhatah pheih chuan a thah pawh an inthah hial hlawmna a nih kha. Chuvangin, an target pui ber chu tui in tur a nia, a hnuaiah thil chi hrang hrang 4/5 lai hemi subject hi rawn ti ula, a bakah in duh chu rawn belh ula a ti a. Kan hun neih kha minute 5 pawh a ni mang lo a nia, Chief Minister 30 chuang leh Central Minister-in kan han insem a nia. A hun semtu Rajnath-a a fet si a, chuvangin ‘a tawi thei ang berin heta in tih sa ziaka min pek hi chu kan lo hre tawh a, in sawi tawhah ngai ula. A bak in belh kha rawn ti rawh u’ an ti a. Chutah chuan kei chuan a A.O.B. ber kha ka zuk sawi belh tak chu a nia, chutah chuan bamboo hliir ka sawi thung. Khatah khan, ‘Prime Minister, lo hria la; Finance Minister, lo hria la; NITI AAYOK Vice Chairman, lo hria ula - nakinah kan Budget Session zawhah he kan bamboo, in NITI AAYOK, NITI AAYOK kha chu National Institute for Transformation of India a nia, a transform na tur tak, kan economy transform (siam danglam) tu tur chu kan bamboo hi nia kan ngaih avangin hei hi saptawngin the most NITI AAYOK a ni e’, ka zuk ti a ni. Keini tan chuan hei hi a NITI AAYOK lai tak kha a nih vang a ni. ‘In office kan rawn kik ang a, heta tang hian hemi ami tur hi kan mamawh dawn, chu chu kan rawn

sawi dawn a ni', ka ti a. A hnuhng ber dawttuah min ko va, ka hnungah Arunachal chauh a awm tawh si a. Ka sawi tantirhah, 'Pu Chairman, ka hming bulah 'Z' a awm avangin a hnuhng berah min ko dawn emaw ka ti a', ka'n tia. Khata tang khan an nui hak a, mi ning tawh kha ka han kaiharh te te a. Khata tang khan ka'n sawi a, minute 5 pawh ka sawi mang lo, hun kha a chep tawh si a ( PU LALDUHOMA : Pu Speaker, kan flagship programme hi Mau nilovin Rua a ni tih te kha a awmin kan lo hria a, a eng zawk hi nge ni tih te kha sawi a va tha ve) chutia min cho chhuah laklawh zel chuan, in ning ang tih ka hlau bawk alawm mawle. (SPEAKER : Ka rin aiin ngaihnam in ti zawk tlat mai a, a lehlam zawk hian).

Mau kha tuna kan Mau awmsa pawh hi a hman theih ang angin kan hming ang a. Mahse plantation (a phun a phun) tur chuan kan Mau awmsa hi a zung puak atanga lo kal a nia, a intet hleih lutuk a, hemi bialah hian pu khat la dawn ila kan hmu tawk tawk emaw a ni ang a. Raw lian tun ami kan tih chu raw pakhat kha pa 3 zawn ania, pa 2 chuan kan zo lo ! Ka huan amite khi pa 2 chuan kan zo lo, 3 a ngai a ni. Ft. 50/60 a sei a nia, a len lam kha inches 15-20 inkar a nia, ft. 10-a a bul ka tan kha ka pu a, rit ka ti mah mah a ni. Chuvangin, kha kha tuna plantation kan tih tur chu a ni a, Rua a ni. Chuvangin, hmanlai kan Mizo Vawk vulh ai chuan Australian Vawk vulh kan duh tawh zawk a. Vaiho tih dan takah 'desi murki ai chuan broiler kha a tul zawk e' tih ang deuh khan a lian law law kha tuna kan tih tum chu a ni a. Kan term hmasaah khan a phun tura kha a chi siam thiam an awm lova, a chi a rah kan nghah dawn chuan kum 50 danah a tam a, kan nghah a ngai si a, kum 50 nghah theih a ni si lova. 'Tissue culture-in in thiam em?' ka ti a, khawvel World Bamboo Congress-ah ka zawt a. Annin 'tuman kan la thiam lo, OPIN Company Belgium ami saw zawt la, anni sawn an thiam ber' an ti a. Ka va zawt a, annin 'kan la thiam lo' an ti a. 2010 khan Hosur-ah, Bangalore bula Hosur-ah Dr. Bartia'n 'ka thiam ta e, ka hmuchhuak e, Brandisye in, chu pawh chikhat chiahin' a ti a. Chuta tang chuan kan tan a. Khita ka huana Latiphorus kha ka pe thla a, a 2-in a siam thiam ta a. A len lam chu a intiat thawkhat a, a that lam pawh a inang thawkhatah kan ngai a, chumi chu tuna kan tih hi a ni a. Tunah pawh, 'kar

2 hnuah chuan a chi kha a hmasa berin in lo tihlen turin 10,000 ka rawn thawn ang e, a hnuah hian thlatin 100,000 ka rawn thawn thei ang em aw ', a ti a. Chu chu tuna kan beih chhoh tur mek chu a ni a. Chuvangin, Rua kha tunah hi chuan kan tui a ni tih an hriat hian khawvel company lian dang pawh hian min rawn dawr nasa khawp mai a. ' Mizoramah khan industry lian kan rawn bun ang a, tichuan paper mill te leh thil dang ', an ti a. Mahse, 'ngawi rawh u, hei chu kan industry hi hnam dang nilovin Mizo tlangval te, Mizo pa te ngeiin an bun tura kan tih a ni', kan ti a. Chuvangin, keimahnin a production nen, a processing nen, a market te nen Mizote vekin tih kan tum a nih avang khan hei hi khulamah pawh ka zuk au pui ber thin kha a nia. Pathianin rem a tih chuan session zawhah Delhi lama kan zin leh a nih chuan a pawimawh ber chu kalkawng a ni tlat a, tuipui mawnga Tuikep lung tha tak awm, diver (liluh) thiam neih si loh chuan engmah a ni lo tih ang chiah kha a ni a. A phurh luhna kan neih loh chuan raw pakhat pawh pa 3 zawn a nih chuan headload in a lak theih si lova, chuvangin kawng kha a ngai a. Ka ti ngat a, 'ka lo kal leh hunah chuan bamboo road gospel hi ka rawn hril dawn a ni' ka ti a ni. Prime Minister atang lo chuan a tan theih loh,

vaibelchhe sang bi a hnai tlat ! Chuvangin kawng siamna tur kha tunah pawh thil dang ka sawi duh lo, 'Mr. Prime Minister, lo chhinchhiah rawh; Finance Minister, chhinchhiah rawh; NITI AAYOG Vice Chairman, chhinchhiah rawh, he bamboo road hi nakinah he mission pui hi ka rawn kalpui dawn', ka ti a. Anmahni pawh kha an hming ko meuhin mi tih duh loh kha ka zuk ti a nia. Chuvangin, 'A a mang e,' min tih chuan at hlawnah tham khawp khan a tal pawh kha ka zuk tal ve hle a ni. A dawta kan dinner-ah pawh Kamal Nath-a te ho, a senior ho kha chuan, 'I thusawi kha kan duh ber, tiang khan a tha,' an ti a. 'We like your speech best,' an lo ti a, min fak der ve pawh a ni ang a, at kan zuk so va, an lo duh ta phian a nih kha! Engpawhnise kha kha kan tum a nia, mahse, thil pakhatah chuan kan ram ah sq. km. 70000 chuang lova neih theih, a awih dan pawh 0-4 a awm. Chu chu buh chin nana kan hman chuan chaw ah kan intodelh vek thei.

Nichina member ten an sawi hla tak atanga phura, rit taka harsa taka Punjab buhfai tih kha, a pumpelh thei a, min chawm zo khawp leilet ram kan nei. Bamboo-ah in tin in nuai 5 atanga nuai 10 aia tam kan lakluh theihna tur ram, a mipui let 3,

let 4 chawm thei kan nei. Ruahtui duhthusam kan nei. Lui ni se kan sawi dan takah Jordan tiat lek lek chu Tiau leh Langkaih inkarah a thelh mai a nia maw, kan ngah lutuk a, chuvangin engkim kan lei hnuai oil leh gas a tam bawk si a. Hemi hi ka sawi dan thinah chuan Mizoram hi ram ruak ni se, Japan mipui maktaduai khat chemtum nen lo lut se, kum sawm-ah India ram state-ah chuan a per capita income sang ber an ni ang ti ila in ring em an ti a, “Ring e, kei pawhin ka ring.” Engah nge kan tih loh bik ang, Japan ho chu ni se an thei tur ti a, Chhura chengkek lo tur ang mai a, kawihkura thlah leh ringawt kha a ni lo reng reng !

Chuvangin hei hi chu kan explore ang a, Mizoram hi economy more or less-in Delhi-a inngat vek lovin tih kan tum a ni tih kha tuna kan SEDP pawhin a zuk ken, zuk hlauhawmna ber kha a ni e. Pu Speaker, kan sawi tui lutuk ang a, kan sawi rei lutuk ang e. (Interruption : Indaihlohna kha wind up-ah khan khawngaih takin, Finance Minister a nih angin, an hlawh kha) Hlawh indaih kanrawn pe em em ang, amaherawhchu khap tawh hnu pawha lak leh zel kha chu tih tawh loh a tha a, chuti lo chuan a lak tam lutuk erawh kha chu kan lo khap ve ang a. (Pu. C. Ngunlianchnunga : Constitution and Conduct of Business Rules an nei a, khalaiah khan an lak theih tur chin piahlama kha lak a ni bik lova, court case te pawh kha a awm an han tih khan, an thuneiha chin leh mamawhnaah khan thawktu helaiah pawh kan indaihloh dan kan hre theuh mai a, khami avanga kal kha a nia. Khawngaih takin, a lawmawm e, Pu Speaker. District Council te hlawh daih min pek sak dawn avangin, District Council aiawh pawhin lawmthu ka sawi e.)

Amaherawhchu kan pawisa pek zawng zawng kha hlawhah in hmang zo vek ang a, development lam erawh chu engmah chang tham mang lo khan an ti ang tih erawh chu kan hlau khawp a. Hlawh daih chu pek kan tum hrim hrim a, amaherawhchu kan sawi ang khan hetah pawh miin thawktu kan inlak tam lutuk chuan, tunah pawh en ila, Mizoram mipui maktaduai khat lekah khan sorkar hnathawk hi sing ruk chuang kan ni tawh a nia. Khati chung khan lak belh chu a la ngai ang reng bawk si a, chhiarkawp tihthiam pawh a ngai khawp mai a. (Interruption : Salary component kha chu hlawh tur a ni mai a, non salary kha chu a lo pe tlem deuh a nih pawhin a salary component chauh tala kha a nia ka'n sawi ni.) Kha kha zawng, hlawh la lova an awm chu kan remti lovanga, a tul ang zelin kan pek belh em em ang a, amaherawhchu tam lutuk hnathawk tur inlak erawh chu a tha lo ve.

Engpawhnise Pu Speaker, khati kha ka sawi chin ni se, ka hun ka la rei ta khawp a, in ngaihdamna pawh ka dil e. Ka lawm e.

**SPEAKER** : Kan House Leader-in a han wind up tak tak mai chu, opposition hian ngaihthlak nuam an ti zawkin ka hria. A hlimawm hle mai, kan pu hi han belchiang ve ula in hre mai ang.

Health Care chungchang kha, kan House Leader-in a sawi kha, 2008 khan MNF khan Asia Development Bank atangin US dollar million 100 an puk a, Health khan million 25 kan chang ve a, tichuan Health Department-ah khan 25 chu India tangkaa kan chantir khan vaibelchhe 117 leh nuai 82 vel niin ka hria. Kha kha kan khawih ta lo ngar ngar tluk a ni a, hei hi a mak khawp mai. Ministry thar Pu Rama sorkar bawkin a rawn khawih leh a, a lo pung tawh nen chuan tam tak a ni. A ngaihthlaknawm khawp mai, kan sawihona a ngaihthlaknawm a, tin, kan phur hlawm tlang baw a, kan pangpar mawi tih zawng zawng hi a inang dawn lo a ni tih kha ka chiang reng mai a. Mahse, nimin atanga ka ngaihthlak danah chuan kan budget bu pumpui en hian leh in sawinaah khan, 'Rose hi chu a parmawi khat a nih hi a,' kan ti niin ka hria.

Aw le, kan budget sawihona kan neih chu kan lo zo ta a. Member te thahnaemngai taka in sawi te kan Chief Minister-in a rawn wind up tha a, a lawmawm a. Tunah chuan kan sawihona kan duhtawk avangin kan chawl tawh ang a, naktuk dar 10:30-ah kan thukhawm leh dawn nia.

Sitting is adjourned. 3:20 PM